

TUTÚ DÍHNA NUU NĬ CADÚHA TÉ PĀBLÚ QUIHIⁿ NDAHA ÑÁYIU ÑUÚ CÒRINTÚ

*Té Pāblú cáduha-dé tutú quihiⁿ ndaha ñáyi
xĩndecu ichi Xítoho Jesucristú ndécú ñúú Còrintú*

¹ Yúhú té Pāblú ní cáháⁿ ñáhá Yă Ndiõxí xii-í cuendá sá cáháⁿ-í tnúhu Xítoho Jesucristú núú ñáyi, chi ducaⁿ ñí cachí Yă Ndiõxí cunduu. Te càdúha-í tutú-a ndihí té Sõstenes tée ndècu ndihí-o ichi Xítoho Jesucristú ² cuendá daquixi-í ndaha nchòhó ñáyi xĩndecu ichi Yă Ndiõxí ndécú ñúú Còrintú, chi nchòhó cúú-ndó ñáyi cùu cuendá Yă Ndiõxí cuendá sá ndécú ndihí-ndo Xítoho Jesucristú. Te diu-ni-ndo cùu-ndo ñáyi ní cáháⁿ ñáhá Yă Ndiõxí cuendá cundecu yĩñùhu-ndo núú-gă, ndihí nchaa dava-gă ñáyi ndècu nchaa xichí, ñáyi cāchí sá ío cāhnu cuu Xítoho Jesucristú. Te Yaá-áⁿ cúú-gă Xítoho-yu, te diu-ni-gă cúú-gă Xítoho nchoo tucu. ³ Te xicáⁿ táhù-í núú Tātá-ó Dütú Ndiõxí ndihí núú Xítoho Jesucristú sá ndi nduú-gă ío na chĩndee chitúu ñaha-gă xii-ndo, te ío váha cuu iní-ndó cùndecu-ndo.

Yă Ndiõxí ío chĩndee ñaha-gă xii-o cuendá sá ndécú-ó ndihí Xítoho Jesucristú

⁴ Te ducaⁿ-ni ío ndācāⁿ táhù-í núú Yă Ndiõxí cuendá-ndó, chi mee-gă ío chĩndee chitúu ñaha-gă xii-ndo sá cuendá Xítoho Jesucristú. ⁵ Te cuendá sá ndécú-ndó ndihí Xítoho Jesucristú, núu xiáⁿ Yă

Ndiöxí ío chindee ñaha-gá xii-ndo sàà díquí-ndó nàcuáa cáháⁿ-ndó, ndìhì nàcuáa cùnuní iní-ndó, ⁶ chi tnúhu sá ni ñhí-ndó cuendá Xítohó Jesucristú ní quée-xi iní-ndó. ⁷ Te xíáⁿ nũu nchaa sá vãha ñá túú tnàhí cùmání xii-ndo chi Yá Ndiöxí ío chindee ñaha-gá. Te ducaⁿ quide-gá ñini nchòhó ni yũhu ni iní-ndó ndètu-ndo sáá nduu quixi tucu Xítohó Jesucristú. ⁸ Te Yá Ndiöxí ducaⁿ-ni ïo chindee ñaha-gá xii-ndo cuendá sá vã yõ teñaha cuèchi nduu na quixi tucu Xítohó Jesucristú. ⁹ Te nchaa sá càháⁿ Yã Ndiöxí dacuití quide-gá, te diu-gá cúú-gã Yaá ní cáháⁿ ñáhá xii-ndo cuendá cuu ñⁿnuu-ndo ndìhì Déhe-gá Xítohó Jesucristú Yaá cúú Xítohó-ó.

Ñá túú cùu ñⁿnuu ñáyiu ndècu ichi Xítohó Jesucristú

¹⁰ Te nchòhó ñáyiu ndècu ndìhì-í ichi Xítohó Jesucristú càháⁿ-í dóho-ndo sã vã ndì díⁿ càni iní-ndó, te ío cuu ñⁿnuu-ndo cùndecu-ndo, te ñⁿ-ni càni iní-ndó, te ñⁿ-ni càda-ndo chi ducaⁿ cuiní-gá cunduu. ¹¹ Te duha càháⁿ-í dóho nchòhó ñáyiu ndècu ndìhì-í ichi Xítohó Jesucristú, chi cue ñáyiu vehe té Clòé ní cachí tnúhu-yu xii-í sá ñà túú cùu ñⁿnuu-ndo ndecu-ndo. ¹² Te duha ndùu tnúhu ní ñhì-í nàcuáa cùu ndecu-ndo, chi dava-ndo càchí-ndó: “Yúhú cúú-í cuendá té Pàblú.” Te dava-ndo càchí-ndó: “Yúhú cúú-í cuendá té Àpolós.” Te dava-ndo càchí-ndó: “Yúhú cúú-í cuendá té Pèlú.” Te dava tucu-ndo càchí-ndó: “Yúhú cúú-í cuendá Xítohó Jesucristú”, duha càchí-ndó. ¹³ Te vá dúcáⁿ cãháⁿ-ndó chi ñá túú nã daha Xítohó Jesucristú ndécú chi ñⁿdì-ni-gá. Te ñá díú yũhú té Pàblú ní xhí-í núú cùrúxí sá cuendá-ndó, te ni ñà túú ní sàndute-ndo cuendá sá

yǎhú cuu cuendá ñáhà-í xii-ndo. ¹⁴ Te táxǎhu xii Yá Ndiǒxí chi ñá díú nchàa-ndo ni dacuandute-í, chi té Crispú-ni ndìhi té Gàyú-ni ní dácuañdute-í-güedé. ¹⁵ Te xíǎⁿ nǔu vá cúú tnàhí cáháⁿ-ndó sǎ ñǎ sandute-ndo sǎ cúú cuendá ñáhà-í xii-ndo. ¹⁶ Te ní ndacu tucu iní-í sǎ tnàhá tucu ñáyiú cùu ndi mee té Èstéfanás ní dácuañdute-í, te diu-ná ñáyiú-án te sànuu sǎ ñà túú-gǎ nágá ñáyiú ni dàcuandute-í. ¹⁷ Te Xítohó Jesucristú ñá túú ní tëndaha ñaha-gá xii-í sǎ dácuañdute-í ñáyiú, chi ní tendaha ñaha-gá xii-í sǎ càháⁿ-í tnúhu-gá núǎ-yu, tnúhu sǎ càháⁿ nàcuáa naníhí tàhú-ó. Te ñá túú càháⁿ-í dàtná càháⁿ ñáyiú túha. Te ducaⁿ quide-í cuendá sǎ nchòhó quíndáá váha iní-ndó tnúhu sǎ càháⁿ nàcuáa ní xíhí Xítohó Jesucristú núú cùrúxí. Chi núu na càháⁿ-í dàtná càháⁿ ñáyiú túha te nchòhó vá quíndáá iní-ndó tnúhu-án nàcuáa tàú-xi cunduu.

Sá cuendá Xítohó Jesucristú cùnùní iní-ó sǎ ïo cǎhnu cuu Yá Ndiǒxí

¹⁸ Te nchaa ñáyiú ta xǐta nihnu cuáháⁿ càchí-yu sǎ ñà túú nàndìhi tnúhu sǎ càháⁿ nàcuáa ní xíhí Xítohó Jesucristú núú cùrúxí, dico sǎ cúú-xi nchòo ñáyiú sa ní naníhí tàhú, chi tnúhu-án cúú-xí ìⁿ tnúhu sǎ ñǎ taxi Yá Ndiǒxí ndécú ndìhi-o cuendá ndacu-gá cada-gá nchaa nàcuáa cuiní-gá iní-ó, ¹⁹ te quèe ndáá-xi nàcuáa càháⁿ-gá núú tütú-gá núú càchí-xi: Yúhú cada-í te nchaa ñáyiú túha vá nándìhi-gá nchaa sǎ xíní tnùní-yu, te nchaa ñáyiú ïo váha sàá díquí-xi vá nándìhi-gá nchaa nàcuáa sàni iní-yu. Duha càchí Yǎ Ndiǒxí núú tütú-gá.

20 Te xíãⁿ cútnùnì iní-ó sã ncháá ñáyiu sàni iní-xi sá ïo túha ndècu ñuyíú-a, ndihì nchaa cue téé dàcuaha ñaha xii-yu nchaa tnúhu ní chídó tnùnì ndíi Moisés, ndihì nchaa ñáyiu ío váha sàá díquí-xi càháⁿ cuendá nchaa sá ío ñuyíú-a, te nchaa ñáyiu-áⁿ càchí Yã Ndiõxí sá ñà túú nàndíhì nchaa sá xìnì tnùnì-yu sá cúú-xí-gã. 21 Te Yá Ndiõxí ío váha cùtnùnì iní-gá nàcuáa quìde-gá, chi ñá túú dàña-gá cundecu ndihì ñàhá-yu xii-gá sá cuendá nchaa sá ñí sáá díquí méẽ-yu, te ducaⁿ quìde-gá chi cuìnì-gá sá cùndedóho-yu tnúhu sá sání iní-yu ñá túú nàndíhì. Te sá cuendá tnúhu-áⁿ te naníhí tàhú-yu te núu na quìndáá iní ñáhã-yu xii-gá.

22 Te cue ñáyiu isràél cuìnì-yu quìnì-yu sá vã yõo tnàhí ndàcu cada, te cue ñáyiu griègú nchìcúⁿ nihnú-yu nchaa sá dácuàha ñáyiu ío túha. 23 Dico nchoo yìhì-o càháⁿ-ó núú ñáyiu sá Xítohó Jesucrístú ní xihí-gá núú cùrúxí. Te cue ñáyiu isràél ñá túú tnàhí tnàhá iní-yu cundedóho-yu tnúhu-áⁿ. Te cue ñáyiu ñá túú cùu ñáyiu isràél càchí-yu sá ñà túú vèdana nàndíhì tnúhu-áⁿ. 24 Dico sá cúú-xí nchaa ñáyiu ní càháⁿ ñáhã Yã Ndiõxí chi cuèi cùú-yu ñáyiu isràél àdi ñá túú cùú-yu, dico ñáyiu-áⁿ càchí-yu sá sã cuendá Xítohó Jesucrístú cútnùnì iní-yu sá ïo càhnu cuu Yá Ndiõxí te ndècu ndihì-gá nchaa sá xìnì tnùnì-gá. 25 Te sá quidé Yã Ndiõxí càchí ñáyiu ñuyíú-a sá ñà túú nàndíhì, dico xíãⁿ ío-gá nàndíhì dàcúúxí sã sání iní méẽ-yu. Te sá ñí xihí Xítohó Jesucrístú núú cùrúxí, xíãⁿ càchí ñáyiu sá ñà túú ní nihí ndéé Yã Ndiõxí cada-gá sá ñí sani iní-gá cada-gá. Dico sá dúcáⁿ ñí quide Yá Ndiõxí, xíãⁿ

cúu-xí sǎ ìo-gá ní níhí ndéé-gǎ ní quide-gá ì# sá nǎ sani iní-gá dàcúúxí sǎ sání iní mée ñǎyiu ñuyíú-a. ²⁶ Te nchòhó ñáyiu ndècu ndìhì-í ichi Xítóhó Jesucristú, chí dándàcu iní nàcuáa ndècu-ndo cútnàhá ní càháⁿ ñáhá Yǎ Ndiǒxí xii-ndo, chí sacú-ni-ndo túha dàcúúxí ñáyiu ñá túú ndècu ichi-gá. Te ducaⁿ sàcú-ni-ndo tàxi tnuní-ndó, te diu-ni ducaⁿ sàcú-ndó nèhe ñáyiu sá yíñùhu núú-ndó. ²⁷ Te ñáyiu ñá túú ndècu ichi Yá Ndiǒxí càchí-yu sá ñà túú tnàhí túha dàva-gá tnàha ñáyíú-yu, dico dàva ñáyiu ñá túú túha-án càháⁿ ñáhá Yǎ Ndiǒxí xii-yu cundecú-yu ichi-gá, te cundecu ndìhì ñaha-gǎ xií-yu, te ducaⁿ dándóo canúú-yu nchaa ñáyiu càchí sǎ ìo túha. Te càháⁿ tucu-gá ñáyiu càchí dàva-gá ñáyiu sá ñà túú tnàhí tàú cunuu cundecú-yu ichi-gá, te ducaⁿ cundecu ndìhì ñaha-gá xií-yu, te dándóo canúú-yu nchaa ñáyiu càchí sǎ táxí tnùnì. ²⁸ Te ducaⁿ Yǎ Ndiǒxí càháⁿ-gá ñáyiu ñá túú tnàhí cunuu cundecu ndìhì-gá, ndìhì ñáyiu quèe tíhú núú dàva-gá tnàha ñáyiu-xi, ndìhì ñáyiu càchí-yu sá ñà túú vèdana nàndíhì, nchaa ñáyiu-án càháⁿ-gá cundecu ndìhì-gá, te ducaⁿ quide-gá cuèndá dándóo canúú-yu nchaa ñáyiu càchí sǎ ìo cunuu. ²⁹ Te núu xíǎⁿ ni ì# ñáyiu vá cúu càchí-yu sǎ ìo càhnu cuú-yu núú Yǎ Ndiǒxí. ³⁰ Dico nchòhó chí mee Yǎ Ndiǒxí ní quide-gá ndécú-ndó ndìhì Xítóhó Jesucristú, te Xítóhó Jesucristú ní quide-gá ní cutnùnì iní-ó sǎ Yǎ Ndiǒxí cúu-gǎ Yaá ndécú ndìhì nchaa sǎ xìnì tnùnì-gá. Te diu-ni Xítóhó Jesucristú ní quide-gá cuèndá sǎ nchóó vǎ cundècu-gá cuéchi-o núú Yǎ Ndiǒxí, te ducaⁿ cundecu yíñuhu-o núú-gǎ, te nduu táhú-ó cundecu-o ndìhì-gá ni caa ni quíhìⁿ. ³¹ Te

sá dúcáⁿ quide-gá nõu xĩaⁿ xíní ñũhu-xi cada-o nacuáa cãháⁿ-xi núú tütú Yã Ndiõxí núú cãchí-xi: “Vã cãchí-ndó sã méé-ndó ïo cãhnu cuu-ndo, chi cachí-ndó sã Yãá cúú Xítohó-ndó ïo cãhnu cuu-gá”, duha cãchí-xi núú tütú-gá.

2

*Tnúhu sã cãháⁿ nãcuáa ní cuu ní xíhí Xítohó Jesu-
crístú núú cùrúxí*

¹ Te nchòhó ñãyiu ndècu ndìhí-í ichi Xítohó Jesu-
crístú sa nãha-ndo sã cùtnàhá ní quixi-í ní cãháⁿ-í
tnúhu Yã Ndiõxí núú-ndó, te ñã túú ní cãháⁿ-í dàtná
cãháⁿ ìⁿ ñãyiu ïo váha sàá díquí-xi, àdi datná cãháⁿ
ìⁿ ñãyiu ïo túha. ² Chi cùtnàhá ní xíndecu ndìhí
ñaha-ĩ xii-ndo chi ní sani iní-í sã méé-ní cuendá
Xítohó Jesucrístú cãháⁿ-í núú-ndó ndìhí nacuáa
ní cuu ní xíhí-gá, te diu ducaⁿ ñĩ quide-í. ³ Te
cùtnàhá ní quexio-í núú ndécú-ndó te ni ñã cùtnùní
iní-í nása cada-í ní cùu, te ïo ní quiyùhú iní-í ní
cãháⁿ-í tnúhu-gá núú-ndó. ⁴ Te cùtnàhá ní cãháⁿ-í
nãcuáa ndùu tnúhu Xítohó Jesucrístú núú-ndó, te
nãha-ndo sã Espíritú Yã Ndiõxí ní chindee ñãha-xi
xii-í ní cãháⁿ-í tnúhu-gá núú-ndó, te tnúhu-áⁿ ñĩ
quée-xi iní-ndó. Te ñã túú ní cãháⁿ-í ìⁿ tnúhu
cãhnu núú-ndó tnũhu sã cãháⁿ cue ñãyiu ïo váha
sàá díquí-xi. ⁵ Te ducaⁿ ñĩ cuu cuendá sã nchòhó
quíndáá iní-ndó tnũhu Yã Ndiõxí chi ní quide-gá sã
vãha sã cúú-xí iní-ndó, te ñã díú sã cuendá tnúhu sã
cãháⁿ ñãyiu cãchí sã ïo túha ducaⁿ ñĩ sãndáá iní-ndó
tnũhu-gá.

*Espíritú Yã Ndiõxí quidé-xí cùtnuní iní-ó nãcuáa
sãni iní-gá*

6 Te nchoo càháⁿ-ó tnũhu càhnu núú ñãyiú sa ní níhí ndéé ndècu ichi Xítóhó Jesucrìstú. Te tnúhu-áⁿ ñà túú càháⁿ ñãyiú ñá túú ndècu ichi-gá, te ni cuè téé yìndaha ñaha xií-yu ñá túú càháⁿ-güedé tnúhu-áⁿ chi cue téé-áⁿ naa-güedé. 7 Te tnúhu càhnu-áⁿ cúú-xí tnũhu Yá Ndiõxí, te mee-gã ní cachí-gá ndéé cútnàhá vátá ngáva-gá ñuyiú sã ncháá ñãyiú na quìndáá iní tnúhu-áⁿ te nduu táhũ-yu cundecú-yu ndihí-gá núú ïo váha càa ndecu-gá ni caa ni quíhíⁿ. Te tnúhu-áⁿ ndúú yùhu-xi ni cuu. 8 Te ni ñⁿ cue téé yìndaha cue ñãyiú ñuyiú-a ñá túú tècú tnùnì-güedé tnúhu-áⁿ, chi núú dìcò tècú tnùnì-güedé tnúhu-áⁿ te vá catá càa-güedé Xítóhó Jesucrìstú núú cùrúxí cahni ñaha-güedé xii-gá ní cuu. Te ñⁿ-ni Yaá-áⁿ ïo càhnu cuu-gá. 9 Dico ducaⁿ ñi cuu chi ní quee ndáá-xi nàcuáa càháⁿ-xi núú tùtú Yá Ndiõxí núú càchí-xi: Yá Ndiõxí sa ní sani iní-gá nchaa nàcuáa cada-gá sá cúú-xí cuèndá nchaa ñãyiú cùu iní ñáhá xì-gá.

Te sá ñi sani iní-gá cada-gá cúú-xí sã vátá quìní-gá ñãyiú te ni vátá cùndèdóho-gá-yu, te ni ñà túú tnàhí cùtnuní iní-yu nása cada-gá. Duha càchí-xi núú tùtú-gá. 10 Te mee Yá Ndiõxí ní cachí-gá sá Espiritú-gá cada-xi te nchoo cùtnuní iní-ó ncháa nàcuáa sàni iní-gá cada-gá, ñuu xiáⁿ ducaⁿ tècú tnùnì-ó vìtna, chi Espiritú-gá xìnì-xi nchaandi túhú nàcuáa sàni iní-gá cada-gá.

11 Te ñá ñⁿ ñãyiú xìnì ndáá-yu nàcuáa sàni iní ñngá ñãyiú, chi mee ñãyiú-áⁿ xìnì ndáá-yu nchaa nàcuáa sàni iní-yu. Te ducaⁿ sãtnahá-xi cùu Yá Ndiõxí chi medì-ni Espiritú-gá xìnì-xi nchaa nàcuáa sàni

iní-gá. ¹² Te nchoo chi Yá Ndiöxí ní taxi-gá Espíritú-gá ndécú ndìhi-o, te ñá díú ñùyíú-a ducaⁿ ni quèe espíritú ní ngúndecu ndìhi-o. Te ducaⁿ ñí taxi-gá Espíritú-gá ndécú ndìhi-o cuendá ducaⁿ cùtnuní iní-ó nàcuáa ndùu nchaa sá vãha sá dicó ducaⁿ ñí taxi-gá ndécú ndìhi-o. ¹³ Te cuendá nchaa sá vãha-áⁿ càháⁿ-ndí, te càháⁿ-ndí nàcuáa dàcahu iní ñáhá Espíritú Yá Ndiöxí xii-ndí, te ñá túú càháⁿ-ndí nàcuáa càhu iní ñáyíu ñuyíú-a càháⁿ-yu, te ñíu-ni nchaa tnúhu dàcahu iní ñáhá Espíritú-gá xii-ndí càháⁿ-ndí, ñíu-ni nchaa xíãⁿ dánèhé-ndí nchaa ñáyíu ndècu ndìhi tucu Espíritú-gá.

¹⁴ Te ñáyíu ñá túú ndècu ndìhi Espíritú Yá Ndiöxí ñá túú tnàhá iní-yu nàcuáa ndùu tnúhu dàtecú tnúhu ñaha Espíritú-gá xií-yu, te ni ñà túú tècú tnùní-yu, te càchí-yu sá ñà túú nàndíhi-xi. Te ducaⁿ chi mee-ni nchàa ñáyíu ndècu ndìhi Espíritú-gá tècú tnùní-yu nàcuáa ndùu tnúhu-áⁿ. ¹⁵ Te cue ñáyíu ducaⁿ ndècu ndìhi Espíritú Yá Ndiöxí cùtnuní ndáá iní-yu ná cúú nchàa sá vãha, te vá yõo ñⁿ xìní nchaa nàcuáa sàni iní-yu. ¹⁶ Te núú tütú Yá Ndiöxí càchí-xi: “Vá yõo ñⁿ xìní nàcuáa sàni iní Yá Ndiöxí, núú xíãⁿ vá yõo ñⁿ ndacu ná danèhé ñáhá xì-gá”, duha càchí-xi núú tütú-gá. Te nchoo chi ñⁿ-ni sàni iní-ó ndìhi Xítohó Jesucrìstú.

3

Cue tée xĩquide chiùn Yá Ndiöxí

¹ Te nchòhó ñáyíu ndècu ndìhi-í ichi Xítohó Jesucrìstú càchí tnúhu-í xii-ndo sã ñã ní ñìhì-í nàcuáa cada-í cáháⁿ-í tnúhu-gá núú-ndó dàtná càháⁿ-í núú

nchàa ñáyiú quide nchaa nacuaá càháⁿ Espíritú Yă Ndiöxí, chi ní cáháⁿ-í núú-ndó dàtná càháⁿ-í núú nchàa ñáyiú cùnūu nchaa sá cuèhé sá dúhá ìní-xi, te ní quide ñaha-ĩ xii-ndo dàtná cue ñáyiú íchí ní sándáá iní tnúhu Xítóhó Jesucristú, núu xiáⁿ ducaⁿ ñí cáháⁿ-í núú-ndó. ² Te ní quide ñaha-ĩ xii-ndo dàtná ñⁿ déhe yiquiⁿ vitna sadi camá, te ñá túú ní quide ñaha-í xii-ndo dàtná cue landú sa xèxi dítá, chi ní dánèhé ñáhà-í xii-ndo ñⁿ sá ñà túú tnàhí úhú tecú tnùní-ndó, te ñá túú ní dànehé ñáhà-í xii-ndo ñⁿ sá xítò-í sá vǎ tècú tnùní-ndó. Te quide cuendá-í sá díú-ní dùcaⁿ vǎ tècú tnùní-ndó ndèé vitna te núu na dànehé ñáhà-í xii-ndo nchàa dava-gá tnúhu. ³ Te ducaⁿ chi quide-ni-ndo nacuaá sàni iní méé-ndó, chi ndècu-ni-ndo ichi cuédú ínì, te nàá ndihi tnàha-ni-ndo, te ñá túú tnàhí cùu ñⁿnuu-ndo ndecu-ndo. Te xiáⁿ cùtnùnì sá méé-ní nchàa nacuaá sàni iní méé-ndó quide-ndo, te xiquide-ndo dàtná quidé nchàa ñáyiú ñá túú ndècu ichi Xítóhó Jesucristú. ⁴ Te dava-ndo càchí-ndó: “Yúhú cùu-í cuendá té Pǎblú.” Te dava-ndo càchí-ndó: “Yúhú cùu-í cuendá té Àpolós”, duha càchí-ndó. Te sá dúcáⁿ càháⁿ-ndó xiáⁿ cùtnùnì sá quidé-ní-ndó mèe-ni nchaa nacuaá sàni iní méé-ndó.

⁵ Te yúhú té Pǎblú càchí tnúhu-í xii-ndo sǎ ñà túú cùnūu-í, te ni té Àpolós ñá túú cùnūu-dé chi dícó cue téé xínu cuechi núú Yă Ndiöxí cúú-ndǎ, te ní cáháⁿ-ndí tnúhu-gá núú-ndó, núu xiáⁿ ní sándáá iní-ndó. Te ndǎ dííⁿ ndǎ dííⁿ ndùu chiuⁿ ní táhú Yă Ndiöxí cada-ndí. ⁶ Te yúhú cùu-í dàtná ñⁿ téé chìhi tatá chi dàcaháⁿ ñáhà-í xii-ndo tùha-ndo ichi Yá Ndiöxí. Te té Àpolós cúú-dě dàtná ñⁿ téé nàcuhñu chi téé-áⁿ ndécú-dě dánèhé ñáhà-dě

xii-ndo tnũhu-gá. Te Yá Ndiõxí cúú-gã Yaá quidé sàhnu tatá ní chihí-í-án, te duha càháⁿ-í chi ðiu-gá quidé-gã tá nihí ndéé-ndó ndècu-ndo ichi-gá. ⁷ Te núu xĩⁿ ni téé chihí tatá te ní téé nàcuhũ ñá túú cùnũu-güedé, dico Yá Ndiõxí io cùnũu-gá chi ðiu-gá quidé-gã xĩnu tatá-án te sàhnu-xi. ⁸ Te ìⁿ-ni cùu téé chihí tatá ndihí téé nàcuhũ. Te ducaⁿ sãtnahá-xi cùu nchúhú cue téé xĩquide chiuⁿ Yá Ndiõxí, te nàcuáa ndùu chiuⁿ ní quide-ndí te ducaⁿ cùnũu táhú taxi Yá Ndiõxí nduu táhú-ndí. ⁹ Te nchòhó cúú-ndó dàtná ìⁿ xichi núú nĩ quée tatá, te nchúhú cúú ìⁿnuu-ndí quidé chiuⁿ-ndí xíaⁿ. Te ducaⁿ sãtnahá-xi cùu-ndo chi cùu cuendá ñáhá Yá Ndiõxí xii-ndo, te nchúhú cúú ìⁿnuu-ndí quidé-ndí chiuⁿ-gá.

Te cùu tucu-ndo datná ìⁿ vehe sá vítná sáá, te ducaⁿ sãtnahá-xi cùu-ndo chi Yá Ndiõxí quidé-gã tá sàhnu nihnu-ndo ichi-gá cuáháⁿ. ¹⁰ Te yúhú cúú-í dàtná ìⁿ téé cùnũu dacao vehe te ní tava-í cimièntú-xi, te ðìⁿ cue téé véxi dàcaa-güedé ndóho, te ìⁿ ìⁿ cue téé-án io xini ñuhu-xi cada cuendá-güedé nàcuáa dacàa-güedé. Núu ducaⁿ sãtnahá-xi cùu yúhú chi Yá Ndiõxí ní taxi-gá chiuⁿ quide-í te chìndee ñaha-gá, chi díhna-gá-í ní quixi-í ní cáháⁿ-í tnúhu Xítohó Jesucrìstú núú-ndó, te ðìⁿ cue téé véxi dàcuaha ñaha-ná xii-ndo tnũhu-gá, te ìⁿ ìⁿ cue téé-án io xini ñuhu-xi cada cuendá-güedé nàcuáa dacuàha ñaha-güedé xii-ndo tnũhu-gá. ¹¹ Te cimièntú vehe-án cada iní-ó sã cúú-xi mèe Xítohó Jesucrìstú, te ducaⁿ chi yúhú ní dánèhé ñàhá-í xii-ndo nĩ ngúndecu ndihí-ndo Xítohó Jesucrìstú, te vá yõ-gá cundecu ndihí-ndo chi ìⁿ ðìí-ni-gã ndécú. ¹² Te dava cue téé dàcaa-güedé vehe váha

te chìhi-güedé díhúⁿ cuàáⁿ, ndìhi díhúⁿ cuìxíⁿ, ndìhi yúú sǎ ìo vii càa. Te dava-güedé dácàa-güedé vehe vítú, te dava-güedé dácàa-güedé vehe ité, te dava-güedé dácàa-güedé vehe tnuvixiⁿ. ¹³ Te sáá nduu te nchaa vehe-áⁿ cǎyú-xi, te vehe vítú-ǎⁿ ndìhi vehe ité-áⁿ ndìhi vehe tnuvixiⁿ-áⁿ ndoo ndoo cǎyú, te nchaa vehe váha-áⁿ vǎ cǎyú-xi cuèi na yǎha ñuhú. Te nchaa cue téé ní dácáá vèhe váha-áⁿ cada iní-ó sǎ cúu-güedé ñáyiú ío váha quide chiuⁿ Yá Ndiöxí. Te nchaa cue téé ní dácáá vèhe vítú, ndìhi cue téé ní dácáá vèhe ité, ndìhi cue téé ní dácáá vèhe tnuvixiⁿ cada iní-ó sǎ cúu-güedé ñáyiú ñá túú cuíni cada chiuⁿ Yá Ndiöxí nàcuáa tàú-xi cunduu. Te sáá nduu te cutnùní nàcuáa ndùu chiuⁿ ní quide ìⁿ ìⁿ ñáyiú, chi Yá Ndiöxí cáháⁿ-gá nàcuáa ndùu chiuⁿ ní quide ìⁿ ìⁿ ñáyiú ní quide chiuⁿ-gá. ¹⁴ Te cue ñáyiú ío váha xǐquide chiuⁿ Yá Ndiöxí te cùdí chiuⁿ quidé-yu, te ñáyiú-áⁿ ñìhǐ-yu sá ndúú tǎhǔ-yu. ¹⁵ Te cue ñáyiú ñá túú quide chiuⁿ Yá Ndiöxí nàcuáa tàú-xi cunduu, te vá cùdí chiuⁿ ní quidé-yu chi cuíta te ndóo-ná-yu duha, dico mèe-yu chi naníhí tǎhú-yu.

¹⁶ Te yúhú càháⁿ-í dóho-ndo dándacu-í iní-ndó sǎ cúu-ndó dàtná vehe Yá Ndiöxí, chi Espiritú-gá ndécú ndìhi ñaha-xi xii-ndo. ¹⁷ Te núu yoo na dànaa ñaha xii nchohó ñáyiú cùu veñúhu-gá, te Yá Ndiöxí danàa ñaha-gá xii ñáyiú-áⁿ, te ducaⁿ càda-gá chi nchòhó cúu-ndó ñáyiú cùu cuendá-gá.

¹⁸ Te vá dándàhú-ndó mèe-ndo sá ìo túha-ndo. Te núu ìo dava-ndo sàni iní-ndó sǎ túha-ndo dàtná sání ìní cue ñáyiú ñá túú ndècu ichi Yá Ndiöxí, te cada-ndo sǎ cúu-ndó dàtná ñáyiú ñá túú tnhí túha, te ducaⁿ te cuu ndisa-ndo ñáyiú túha sá cúu-xí

Yă Ndiöxí. ¹⁹ Te nchaa sá xìní tnùní nchaa ñáyiú cächí sá ïo túha ñá túú ndècu ichi Yă Ndiöxí ñá túú nàndíhi-xi sá cúú-xí-gă. Te cächí-xi núú tütú-gá: “Nchaa ñáyiú cächí sá ïo túha te Yă Ndiöxí dandöo canúú ñáhá-gă xií-yu núú nchàa sá quidé-yu”, duha cächí-xi núú tütú-gá. ²⁰ Te cächí tucu-xi ingá xichi: “Yă Ndiöxí cútùní iní-gá nchaa nàcuáa sàni iní ñáyiú cächí sá ïo túha. Te nchaa nàcuáa sàni iní-yu-án cächí-gá sá ñà túú vèdana nàndíhi-xi”, duha cächí-xi núú tütú-gá. ²¹ Núú xiǎⁿ càháⁿ-í dóho-ndo sǎ vǎ cächí-ndó sǎ nchǔhú cue tée dànèhé ñáhá xii-ndo tnúhu-gá ío cǎhnu cuu-ndí. Te nchaa sá ío ñuyíú-a cùu-xi sá vǎha sá cúú-xí-ndó. ²² Te cuèi yúhú ndíhi té Àpolós ndíhi té Pèlú ndécú-ndí sá cúú-xí-ndó, te cuèi nchaa sá ío ñuyíú-a te cuèi nchaa nduu ndècu-ndo te cuèi sá cúú-ndó dico nchaa cùu-xi sá vǎha sá cúú-xí-ndó. Te cuèi nchaa sá ndécú tnàvíí, te cuèi nchaa sá cóo ndèe cuèé-gá nchaa cùu-xi sá vǎha sá cúú-xí-ndó. ²³ Te mee-ndo ndècu-ndo sá cúú-xí Xǐtohó Jesucrístú, te mee Xǐtohó Jesucrístú ndécú-gă sá cúú-xí Yă Ndiöxí.

4

Nàcuáa ndùu chiuⁿ quide cue tée ní táuchúúⁿ Xǐtohó Jesucrístú càháⁿ tnúhu-gá

¹ Te cada cuèndá-ndó sǎ nchǔhú dicó-ni cue tée xínu cuechi núú Xǐtohó Jesucrístú cúú-ndí, te chiuⁿ-án ñí taxi Yă Ndiöxí quidé-ndí càháⁿ-ndí tnúhu sá ñí cachí-gá yíyùhu ni cuu. ² Te xìní ñuhu-xi sá ncháá ñáyiú ducaⁿ ñí sáñaha Yă Ndiöxí chiuⁿ quidé-yu cada ndáá-yu cadá-yu chiuⁿ-án. ³ Te yúhú ñá túú quide cuendá-í nùu nása ndùu tnúhu

càháⁿ-ndó cuendá-í nũu cùu-í téé váha àdi ñá túú cùu-í. Te ðiu-ni ducaⁿ ñà túú quide cuendá-í nũu nása-gá càháⁿ nchaa dava-gá ñáyiú cuendá-í. Te ni mée-í ñá túú càháⁿ-í nũu cùu-í téé váha àdi ñá túú cùu-í. ⁴ Te sànuu iní-í sá ñà túú nã cúmăní-í núú Yă Ndiõxí, dico ñá ðíú sã xĩaⁿ te cachí-í sá ñã túú cuěchi-í ndécú nũú-gă, chi mee-gă náhá ndăá-gá te núu nása quide-í ndécù-í. ⁵ Te nchòhó vá càháⁿ-gá-ndó sã ñà túú cundáá ñáyiú núú Yă Ndiõxí, chi vátá sáa-gá nduu cundáá cuéchi-yu. Te na sáa nduu quixi tucu Xítóhó Jesucrístú te dàvá-án dātúu-gá nchaa sá quidě-yu, nchaa sá ñà túú xini-ó quidě-yu vitna, te ducaⁿ dātúu-gá nchaa nàcuáa sàni iní-yu. Te Yă Ndiõxí cáháⁿ váha-gá cuendá nchaa ñáyiú ní quide váha.

⁶ Te nchòhó ñáyiú ndècu ndihi-í ichi Xítóhó Jesucrístú, càcunehe-í té Àpolós ndihi yúhú núú-ndó dānehé ñáhà-í xii-ndo nàcuáa cada-ndo cuendá ducaⁿ cùu-xi ñⁿ sá váha sá cúu-xi-ndó, ndihi cuendá sá nchòhó canchicúⁿ nihnu-ndo càda-ndo mee-ni nchaa nacuáa yòdo tnuní núú tūtú Yă Ndiõxí. Te ducaⁿ te vá càchí-ndó sã ñⁿ téé càháⁿ tnúhu Yă Ndiõxí ío-gá càhnu cuu-dé dācúúxí ñngá-dé. ⁷ Te nchòhó vá càchí-ndó sã ío-gá cúnũu-ndo dācúúxí dāva-gá ñáyiú chi Yă Ndiõxí ní quide-gá ní ngúndecu ndihi-ndo nchàa sá xini tnùn-í-ndó. Te mee-gă ducaⁿ ñi quide-gá ¿Te ná cuendá nchòhó ducaⁿ quide cahnu-ndo mee-ndo? Te quide-ndo datná tnúhu sá mée-ndó ñi quide-ndo dùcaⁿ ní ngúndecu ndihi-ndo nchàa sá xini tnùn-í-ndó.

⁸ Te nchòhó quidě-ndó sã ñà túú tnàhí-gá ná cúmăní-ndó nũú Yă Ndiõxí, te quide-ndo sá ni ñihí-ndó nchàa sá cuini-ndó nũú-gă ndécú

ndìhi-ndo, te sànuu sá cúú-nă-ndó dàtná cue téé yìndaha ñáyiu, te nchúhú ñá túú cùu ìⁿnuu ndìhi ñaha-ndí xii-ndo quìndaha ndìhi ñaha-ndí xii-ndo ñáyiu, ìte váha-ni te núu dìcò ndisa sá yìndàha-ndo ñáyiu chi tnàhá nchúhú ní tnahá ndìhi ñaha-ndí xii-ndo quìndaha-ó-yu te núu dìcò cúú-xí ìⁿ sá ndàá dico ñáhá! ⁹ Te yúhú quidé cuèndá-í sá nchúhú cue téé ní táuchíúⁿ Xìtohó Jesucrìstú cáháⁿ tnúhu-gá núú ñáyiu ní cachí Yă Ndiöxí sá cúú-ndí cue téé ñá túú nàndíhi sá cúú-xí dàva-gá ñáyiu. Te ní cachí tucu-gá sá cúú-ndí dàtná cue ñáyiu sa ní tnahá òré cuú-xi quíhíⁿ nacháhu cuèchi-xi, te nchaa ñáyiu cùñúhu ñàhá-yu xii-ndí sá dúcáⁿ ndòho-ndí, te tnàhá nchaa espíritú cùñúhu ñaha-xi xii-ndí. ¹⁰ Te cuèndá sá xínú cuèchi-ndí núú Xìtohó Jesucrìstú, xíⁿ cúú-ndí dàtná cue téé ñá túú vèdana nàndíhi sá cúú-xí ñáyiu. Te nchòhó quidé-ndó sã cúú-ndó ñáyiu ío túha ndècu ndìhi Xìtohó Jesucrìstú. Te ñáyiu càchí-yu sá nchúhú cúú-ndí cue téé ñá túú ndàcu cada ìⁿ sá cádá sã cúú-xí Yă Ndiöxí. Te nchòhó quidé-ndó sã cúú-ndó ñáyiu ío váha ndàcu quide ìⁿ sá sání ìní-ndó sã cúú-xí-gă. Te cue ñáyiu dàquee tihú ñáhă-yu xii-ndí, te nchòhó néhě-yu sá yìñùhu núú-ndó. ¹¹ Te nchúhú chi nchaa-ni nduu ío ndòho-ndí, chi xihí-ndí docó, yìchí-ndí ndute, te ñá túú dóo-ndí, te nchaa ñáyiu quide úhú ñáhă-yu xii-ndí, te ni vèhe-ndí ñá túú ndèé cáá cùndecu-ndí. ¹² Te ío ndòho-ndí quidé chiúⁿ-ndí nihí-ndí sá xéxí-ndí. Te cue ñáyiu xìcuèhé ñáhă-yu xii-ndí dico xìcáⁿ táhú-ndí núú Yă Ndiöxí cuèndá-yu, te ñá cúú

tnàhí quiní ndeé ñáhă-yu xii-ndí dico quide cahnu iní-ndí nchaa sá quidé ñáhă-yu. ¹³ Te mee-ni tnũhu cuèhé tnũhu duha cãháⁿ-yu cuendá-ndí dico sãcahnu iní-ndí te dãsahú-ndí-yu mee-ni tnũhu váha. Te cãchí-yu sá cúú-ndí dãtná ìⁿ sá ñà túú-gă vëdana nãndihí, te nchaa-ni nduu ducaⁿ cãháⁿ-yu xãhăⁿ-yu xii-ndí.

¹⁴ Te yúhú duha cãháⁿ-í núú tùtú-a dãsahú ñáhă-í xii-ndo, dico ñá díú tnũhu sá cúú cãháⁿ núú-ndó cãháⁿ-í. Te duha cãháⁿ-í dóho-ndo chi quide iní-í sá sũúní dãtná déhe mee-í cúú-ndó chi ío cùu iní ñáhă-í xii-ndo. ¹⁵ Te nchaa-o ndëcu-o ichi Xítóhó Jesucristú vitna, dico yúhú cúú-í téé díhna nuu ní dãnèhé ñáhă xii-ndo nacuáa nduu tnũhu sá cãháⁿ nacuáa naníhí tãhú-ó, núu xiãⁿ cúú-í dãtná tãtá-ndó. Te cuéi vãi vihi cue téé na quixi-güedé danèhé ñáhă-güedé xii-ndo tnũhu-gá dico ìⁿ ðii-ni yúhú cúú-í téé díhna nuu-gă ní dãnèhé ñáhă xii-ndo tnũhu-gá. ¹⁶ Núu xiãⁿ cãháⁿ-í dóho-ndo sã cãchícúⁿ nihnu-ndo càda-ndo nchaa nacuáa quide-í.

¹⁷ Te xiãⁿ nõu sa ní tendaha-í té Timùteú véxi coto ñaha-dé xii-ndo, te téé-áⁿ ío cùu iní-í-dé te quide ndáá-dé, te cùu-dé dãtná déhe-í chi yúhú ní sanu ichi-í-dé ichi Xítóhó Jesucristú, te téé-áⁿ cachí tnũhu-dé xii-ndo nchaa nacuáa quide-í ndécù-í ichi-gá. Te ðiu-ni nacuáa na cãchí tnũhu-dé-áⁿ ðiu-ni ducaⁿ quide-í nchaa xichi núú tàcá ñáyiu dàcuaha tnũhu Xítóhó Jesucristú. ¹⁸ Te dava nchòhó ío quide cahnu-ndo mee-ndo chi sãni iní-ndó sã vã quixí-gă-í quixi coto ñaha-í xii-ndo. ¹⁹ Dico núu mee Yã Ndiõxí ná cãchí-gá te ío ndĩhi quixi coto ñaha-í xii-ndo, te dàvá-áⁿ quiní-í te núu

nása quide nchaa ñáyiú ducaⁿ ño xǐquide càhnu mee-xi-áⁿ ndécũ-yu ichi Xítóhó Jesucristú. Te vá cáda cuendá-í tnúhu càháⁿ-yu chi chiúⁿ quidé-yu cada cuendá-í. ²⁰ Te vitna yíndaha ñaha Yá Ndióxi xii-o, te chindee ñaha-gá xii-o quide-o nchaa sá vǎha sàni iní-ó quide-o te ñá díú mée-ni sá càháⁿ-ó. ²¹ Te ío chí cání ìní nũ ndédacàa sá vǎha-gá cada-í òré ná quéxi-í núú ndécú-ndó, núú sá ténàá ñáhà-í xii-ndo àdi sá càháⁿ ndìhi ñaha-í xii-ndo ndìhi tnúhu vii tnúhu vǎha nàcuáa cutnùnì iní-ndó sá cúú ìní ñáhà-í xii-ndo.

5

Íⁿ cuéchi càhnu vihi

¹ Te yúhú sa ní níhí ndǎá-í tnúhu nàcuáa cùu ndecu-ndo, chi ñⁿ tée ndècu ndìhi-ndo ndeca-dé nǎná chàhá-dé. Te xǐⁿ cúú-xí ñⁿ cuéchi càhnu vihi, chi ndéé nchaa ñáyiú ñá túú ndècu ichi Yá Ndióxi càchí-yu sá vǎ cúú tnàhí ducaⁿ càda-o. ² ;Te nchòhó ío quide cahnu-ni-ndo mee-ndo xíndecu-ndo! ;Te tàú-ndó sǎ cùndyí-ndó ndìxi cuéchi iní-ndó sǎ dúcáⁿ cùu ndecu-ndo ni cuu! Te tée ducaⁿ quide-áⁿ xíní ñùhu-xi sá vǎ dáñá-gǎ-ndó ñìhí tnáhá ndìhi ñaha-dé xii-ndo ni cùu dico ñá túú dùcaⁿ quide-ndo. ³ Te yúhú ñá túú ndècu ndìhi ñaha-í xii-ndo dico dàtná tnúhu sá ndécú ndìhi ñaha-í xii-ndo chi ducaⁿ-ni ño ñùhu ìní ñáhà-í xii-ndo. Te yúhú càchí-í sá náchǎhu tée-áⁿ cuéchi-dé sá dúcáⁿ quide-dé, te ñiú-ni ducaⁿ cǎháⁿ-í núú-ndó te núú dicó ndécú ndìhi ñaha-í xii-ndo. ⁴ Te òré nátacá-ndó càháⁿ ndìhi-ndo Yá Ndióxi te ñiú-ni Xítóhó Jesucristú ñá túú dàña ndéé-gá chíndèe ñaha-gá xii-ndo, te òré-áⁿ cada-ndo nàcuáa cuìní

Xítohó Jesucrístú cada-ndo, te cada iní-ndó sǎ tñáhá-í ndécú ndìhì ñaha-í xii-ndo. ⁵ Chi tàú-xi sǎ tèe ducaⁿ quide-áⁿ daquèe tìhú-ndó-dě, te ducaⁿ te sácúíhná dandòho ñaha-xi xii-dé cuèi na cùú-dé, dico na sǎá nduu te nduu táhú-dě cundecu-dé ndìhì Xítohó Jesucrístú.

⁶ Te nchòhó ñǎ túú ndùu váha-xi sǎ cǎchí-ndó sǎ ïo cǎhnu cuu-ndo. Te xíní-ndó sǎ cuèi luha-ni levadùrá ná quǐhu yuchi cuáha pàá dándàa-xi cuèi luha-ni nà quǐhu te ñihí-ni yuchi sàháⁿ ndoho-xi. Te ducaⁿ sǎtnahá-xi cùu nchohó chi núu ndècu ndìhì-ndo ìⁿ ñáyiú quide sǎ ñǎ túú vǎha te nchaa-ndo ñǎ túú-gǎ cúú vǎha iní-ndó ndècu-ndo. ⁷ Te xini ñuhu-xi sǎ cǎdá-ndó dàtná quidé cuè ñáyiú quide vico pascuá, chi ñǎ túú chihí-yu levadùrá yuchi cuáha pàá xéxǐ-yu nduu quidé-yu vico-áⁿ. Te sǎ quǐhu pàá-áⁿ cada iní-ó sǎ cúú-xí nchàa sǎ cuèhé sǎ dúhá ñǐ xóo cada-ndo. Te vǎ cǎdá-gǎ-ndó ñǐ ìⁿ sǎ cuèhé sǎ dúhá, te ducaⁿ te cuu-ndo ñáyiú váha chi sa ní nduu ndoo ní nduu nine iní-ndó. Te cue mběé cue quitì ní xóo cahni-güedé nduu pàscuá cue quitì-áⁿ cada iní-ó sǎ cúú-güèdì datná Xítohó Jesucrístú nàcuáa ní xíhí-gǎ núú cùrúxí. ⁸ Te núu xǐáⁿ xíní ñùhu-xi sǎ vǎ cǎdá-gǎ-ndó ñǐ ìⁿ sǎ cuèhé sǎ dúhá sǎ ñǐ xóo cada-ndo, te ñǐ vǎ cùhúⁿ-gǎ iní-ndó te ñǐ vǎ cǎdá-gǎ-ndó, te ñǐ yùhu ñǐ iní-ná-ndó cǎda-ndo mee-ñǐ sǎ vǎha.

⁹ Te tutú sǎ sà ní dáquixì-í ndaha-ndo ñǐ cachí-í sǎ vǎ ñihí tñáhá-ndó ndìhì cue ñáyiú ndècu ichi díí iní. ¹⁰ Te sǎ dúcáⁿ cǎháⁿ-í núú tutú ní dáquixì-í ndaha-ndo te vǎ cǎní ìní-ndó sǎ yùhú cǎchí-í sǎ vǎ cúú-gǎ tnahá tñuhu-ndo ndìhì cue ñáyiú ndècu

ichi cuehé ichi duha, ndìhì ñáyiù ndècu ichi díí ìní, ndìhì ñáyiù xìho nchaa sá ìó ñuyíú, ndìhì ñáyiù dùhu sá ndécú ndìhì tnahà ñáyiù-xì, ndìhì ñáyiù quìde cahnu sá càchí-yu cùu ndióxí te ñá ndàá sá ndiõxí cúú-xí chi dìcò cue téé ñuyíú-a ní cadúha nchaa xíáⁿ, chi núu ducaⁿ na càda-ndo vá tnàhá tnúhu-gá-ndó ndìhì-yu te xìni ñuhu-xì sá vǎ cùndècu-gá-ndó nǔú ndécǔ-yu. ¹¹ Te ñá túú dùcaⁿ quee-xì nacuaá càháⁿ-í núú tütú-í, chi yúhú càchí-í sá vǎ cúú tnàhá tnúhu-ndo ndìhì ñáyiù càchí sá ndécú ichi Xítóhó Jesucristú te ñá ndàá sá ndécǔ-yu ichi-gá. Te núu cùú-yu ñáyiù ndècu ichi díí ìní, àdi cuú-yu ñáyiù xìho nchaa sá ìó ñuyíú-a, àdi cuú-yu ñáyiù quìde cahnu nchaa sá càchí-yu cùu ndióxí te ñá ndàá chi dìcò cue téé ñuyíú-a ní cadúha nchaa xíáⁿ, àdi cuú-yu ñáyiù yiti yùhu-xì, àdi cuú-yu ñáyiù quìhu, àdi cuú-yu ñáyiù dùhu sá ndécú ndìhì tnahà ñáyiù-xì, te nchaa ñáyiù ducaⁿ càchí sá ndécú ichi-gá te ñá ndàá te ducaⁿ xǐquidé-yu, te ni vǎ cúú ñìhì tnàhá-ndó ndìhì-yu caxi-ndo ndìhì-yu. ¹²⁻¹³ Te ñá díú yúhú cúú-í téé cáháⁿ cuendá nchaa ñáyiù ñá túú ndècu ichi Xítóhó Jesucristú nǔu quìde ndáá-yu àdi ñá túú quìde ndáá-yu ndécú-yu, chi mee Yǎ Ndiõxí cáháⁿ-gá te núu nása quìdé-yu ndécú-yu. Dico nchòhó chi tàú-ndó càda cuendá-ndó nǔu nása quìde cue ñáyiù ndècu ndìhì-ndo ichi Xítóhó Jesucristú. Núu xíáⁿ xíní ñùhu-xì daquee tíhú-ndó tée ducaⁿ ñá túú quìde váha ndècu ndìhì-ndo-áⁿ, te vá dáñá-gǎ-ndó ñìhì tnàhá ndìhì ñàha-dé xii-ndo.

Nàcuáa tàú-xi cada ñáyiú ndècu ichi Xítóhó Jesucristú te núu ñá túú ndècu ndihí váha tnàhá-yu

¹ Te dava nchòhó òré ñá túú ndècu ndihí váha tnàha-ndo te cùyii-ndo cuáháⁿ-ndó núú cuè téé cùchiuⁿ ñá túú ndècu ichi Xítóhó Jesucristú sàcáⁿ cuéchi-ndo, te ñá túú dùcaⁿ taú-xi cada-ndo chi núú cuè téé ndècu ichi-gá ducaⁿ tàú-ndó quihíⁿ-ndó càcáⁿ cuéchi-ndo. ² Te nchòhó sa nàha-ndo sá ncháá ñáyiú cùu cuendá Yă Ndiöxí sáá nduu cǎháⁿ-yu te núu ní quide ndáá nchaa dava-gá ñáyiú àdi ñá túú ní quide ndáá-yu, te nchòhó tnàhá-ndó cùu-ndo ñáyiú ducaⁿ cǎháⁿ, te núu ducaⁿ te cutnùní iní-ndó sǎ ndácú-ndó càda ndáá-ndó nchàa cuéchi sá ñǎ túú ũhú cundáá vitna ndècu-ndo ñuyíú-a. ³ Te nchòhó sa nàha-ndo sá ncháá ndéé cue espíritú xínú cuéchi núú Yă Ndiöxí sáá nduu cǎháⁿ-ó te núu nása quide-xi ndecu-xi. jNúu xǎⁿ cútnùní iní-ó sǎ úúⁿ-gǎ ndacu-o càda ndáá-ó nchàa cuéchi sá ió ñuyíú-a! ⁴ Te núu ió dava-ndo ió nása cùu ndecu-ndo te xǎnàá-ndó, te vá quihíⁿ-ndó càcáⁿ cuéchi-ndo núú cuè téé ndèhe-ndo sá ñà túú ndècu-güedé ichi Yă Ndiöxí, dico nchòhó chi da núú cuè téé-áⁿ cuáháⁿ-ndó sàcáⁿ cuéchi-ndo. ⁵ Te duha cǎháⁿ-í cuendá cuc-ahaⁿ núú-ndó chi ñá túú quide váha-ndo sǎ dúcáⁿ quide-ndo. ¿Te náa dìcò-ñǎ ñá túú tnàhí ìⁿ téé cùtnùní iní-xi nàcuáa cada ndáá cuéchi-ndo ndècu ndihí-ndo ichi Xítóhó Jesucristú-ǎⁿ? ⁶ Te nchòhó, ñá túú quide váha-ndo, chi dava-ndo cuáháⁿ-ndó núú cuè téé ñá túú ndècu ichi Xítóhó Jesucristú sàcáⁿ cuéchi-ndo cuendá dava-gá cue ñáyiú ndècu ndihí-ndo ichi-gá.

⁷ Te ñá túú quide váha-ndo sǎ dúcáⁿ nàá ndihí

tnàha-ndo te cuáháⁿ-ndó sàcáⁿ cuéchi-ndo, te váha-gá sá cáda càhnu iní-ndó cuèi nándi na càda ñaha tnaha ñáyiu-ndo xii-ndo cuèi dùhú-yu sá ndécú ndìhi-ndo dico cada càhnu-ni iní-ndó. ⁸ Dico nchòhó chi ñá túú quide cahnu iní-ndó chi da uuⁿ-gá ñá túú quide váha-ndo sàcúú-xí tnàha ñáyiu-ndo, chi cùu úhú iní-ndõ-yu, te dùhu-ndó-yu, te ndéé méé-ndó nàcuáa ndècu-ndo ichi Xítóhó Jesucristú ducaⁿ quide tnaha-ndo.

⁹ Te nchòhó sa nàha-ndo sá ncháá ñáyiu ndècu ichi cuehé ichi duha vá ndúú tãhũ-yu cundecú-yu núú ndécú Yã Ndiõxí táxí tnùní-gá, núu xiãⁿ vá cání iní-ndó sã ñáyiu-áⁿ nduu tãhũ-yu cundecú-yu ndìhi-gá. Te ni cuè ñáyiu ndècu ichi díí iní, te ni cuè ñáyiu quide cahnu nchaa sá càchí-yu cùu ndiõxí te ñá ndáa chi dícó cue téé ñuyiú-a ní cadúha nchaa xiãⁿ, te ni cuè téé càháⁿ ndìhi ñadìhí te ñá díú ñadìhí-güedé cúũ-yu, te ni cuè ñáyiu dìhí càháⁿ ndìhi téé te ñá díú yíi-yu cùu-güedé, te ni cuè téé càháⁿ ndìhi tnàha téé-xi, ¹⁰ te ni cuè ñáyiu dùhu, te ni cuè ñáyiu xìho sá ndécú ndìhi tnaha ñáyiu-xi, te ni cuè ñáyiu quihu, te ni cuè ñáyiu càháⁿ úhú, te ni cuè ñáyiu dãnícuehé tnàha ñáyiu-xi te dùhu ñahá-yu, te ni ìⁿ cue ñáyiu duha xíquide vá ndúú tãhũ-yu cundecú-yu núú ndécú Yã Ndiõxí táxí tnùní-gá. ¹¹ Te dava nchòhó ducaⁿ ñí xóo cada-ndo ni cùu, te vitna ní cuu-ndo ñáyiu sa ní nduu ndoo ní nduu nine iní-xi, te ní cuu-ndo ñáyiu cùu cuendá Yã Ndiõxí, te ní cuu tucu-ndo ñáyiu ñá túú-gã cuéchi-xi ndècu núú-gã. Te ducaⁿ ñí quide ñaha Yã Ndiõxí xii-ndo sã váha sá cuendá Xítóhó Jesucristú, te ní ngúndecu ndìhi-ndo Espíritú Yã

Ndiõxí.

Nàcuáa ndùu cuendá yiqui cùñú-ó

¹² Te càchí ñáyiú sá ncháá sã sání ìní-ó cuu cada-o, te ndáá càháⁿ-yu dicó-ni sá ñã ncháá cùu-xi sá vãha sá cúú-xí-ó. Te núu cuíni nchaa sá sání ìní-ó-ãⁿ taxi tnùni ñáhá-xí te vã cáda-ó. ¹³ Te nchòhó sa xìní-ndó sã ncháá sã xéxí-ó cuãguee-xi xití-ó, te xití-ó ñi cuáha tnàhí-xi sá cúhúⁿ nchaa sá cáxí-ó, dico xití-ó ndihí nchaa sá xéxí-ó chi naa-xi. Te Xítóhó Jesucristú néhé cuendá-gá yiqui cùñú-ó, te ducaⁿ yiqui cuñú-ó cùu-xi cuendá-gá, te ñã túú ní cuáha yiqui cùñú-ó sã cùndècu-xi ichi dǐí ìní. ¹⁴ Te dàtná ní quide Yá Ndiõxí ní dándótó-gã Xítóhó Jesucristú ducaⁿ càda ñaha-gá xii nchoo tùcu chi dandòto ñaha-gá xii-o nõu na cùú-ó, chi ndàcu-gá quidé-gã nchaa sá vãha.

¹⁵ Te nchòhó sa naha-ndo sá yiqui cuñú-ó cùu-xi cuendá Xítóhó Jesucristú chi ìⁿ-ni cùu-o ndihí-gá, núu xiãⁿ ñã túú tnàhí ndùu váha-xi cáháⁿ ndihí-o ñáyiú ndècu ichi dǐí ìní, chi yiqui cùñú-ó cùu-xi cuendá Xítóhó Jesucristú, te núu ducaⁿ na càda-o te cada ìní-ó sã cuendá-nã ñáyiú-áⁿ cúú yiqui cuñú-ó, núu xiãⁿ ñã túú tnàhí ndùu váha-xi ducaⁿ càda-o. ¹⁶ Te sa xìní-ndó sã nõu ìⁿ téé na càháⁿ ndihí-dé ìⁿ ñadhí ndécú ichi dǐí ìní te cada ìní-ó sã ìⁿ-nã yiqui cùñú cúú-yu. Te ducaⁿ càháⁿ-xi núú tütú Yá Ndiõxí núú càchí-xi: “Ìⁿ téé na càháⁿ ndihí-dé ìⁿ ñadhí te ìⁿ-nã yiqui cùñú cúú-yu”, duha càchí-xi. ¹⁷ Te ducaⁿ sãtnahá-xi cùu nchaa ñáyiú tnàhá tnúhu ndihí Xítóhó Jesucristú, chi ìⁿ-nã cúú-yu ndihí-gá. ¹⁸ Te núu xiãⁿ càháⁿ-í dóho-ndo sã vã cùndècu-ndo ichi dǐí ìní, chi núu ducaⁿ na càda-ndo

te ñá túú tnàhí sá vǎha cùu-xi sá cúú-xí yìqui cuñú-ndó chi ío dàcuíta nihnu-xi yìqui cùñú-ndó. Te nchaa dava-gá sá cuèhé sá dúhá ñà túú quìde-xi yìqui cuñú-ndó dàtná quidé xǎⁿ. ¹⁹ Te nchòhó sa cùtnuní iní-ndó sǎ yìqui cuñú-ndó cùu-xi datná ìⁿ vehe núú ndécú Espíritú Yǎ Ndiǒxí. Te ducaⁿ sǎtnahá-xi cùu yìqui cuñú-ndó chi ndècu-ndo ndìhi Espíritú-gá. Te mee-gǎ ní taxi-gá Espíritú-gá ndécú ndìhi-ndo, te ñá díú mèe-ndo cuu cuendá-ndó mèe-ndo chi Yá Ndiǒxí cúú cuendá ñáhá-gǎ xii-ndo. ²⁰ Te ducaⁿ cùu-ndo ñáyiu cùu cuendá Yǎ Ndiǒxí chi Xítóhó Jesucristú ní nacháhu-gá nchaa yíca cuèchi-ndo. Te núu xǎⁿ xíní ñùhu-xi sá ñìhí ní ndúú-ndó càda-ndo nacuáa cuu càhnu Yá Ndiǒxí, te ducaⁿ tàú-xi cada-ndo chi espíritú-ndó ndìhi yìqui cuñú-ndó cùu-xi cuendá-gá.

7

Sáhú sǎ cúú-xí ñáyiu ní tnándaha

¹ Te ní quexìo tutú sá ñǎ dáquixí-ndó ndàha-í, te vitna na càchí tnúhu-í xii-ndo cuendá tnúhu càháⁿ-ndó nùú tütú-ndó. Te vǎha cada-xi te núu vá cándèca téè ñadìhí, te ducaⁿ-ni vǎha cada-xi te núu ñáyiu dìhí vá cándècá-yu téè. ² Te dìcò-ni sá nùu ducaⁿ na càda-ndo te dava-ndo càni iní-ndó cùndecu-ndo ichi díí ìní. Núu xǎⁿ xíní ñùhu-xi sá ncháá cuè téè ndi dííⁿ cùndecu ñadìhí-güedé, te ducaⁿ-ni tucu nchaa cue ñáyiu dìhí ndi dííⁿ cùndecu yíí-yu. ³ Te càchí tnúhu-í xii-ndo sǎ ncháá cuè téè vá cúú càchí-güedé sá vǎ cúú càháⁿ ndìhi-güedé ñadìhí-güedé, te dìu-ni ducaⁿ cuè ñáyiu dìhí tucu, vá cúú càchí-yu sá vǎ cúú càháⁿ ndìhí-yu yíí-yu.

4 Te nchaa cue ñáyiú ðìhí chi ñá díú mề-ní-yu cùu cuendá-yu yiqui cùñú-yu chi tnàhá cúú cuendá yíi-yu, te ducaⁿ-ni nchàa cue téé tucu chi ñá díú-ní mề-güedé cúú cuendá-güedé yiqui cùñú-güedé chi tnàhá cúú cuendá cue ñadìhí-güedé. 5 Te cue téé vá cúú càchí-güedé sá vǎ cúú cǎháⁿ ndihí-güedé ñadìhí-güedé. Te ni cuè ñáyiú ðìhí vá cúú càchí-yu sá vǎ cúú cǎháⁿ ndihí-yu yíi-yu. Àdi te núu ní ndatnúhu-yu sá vǎ dúcáⁿ càdá-yu ìⁿ úú nduu cuendá sá cuíní-yu ío cǎháⁿ ndihí-yu Yá Ndiöxí, dico nà yáha núu ná daha nduu ducaⁿ ní ndatnúhu-yu sá vǎ dúcáⁿ càdá-yu te naníhí tnàhá tùcú-yu, chi núu ñáhá te cudana te vá cuácàhnu iní-yu te sácuíhna dacàháⁿ ñáhá-xí xìi-yu cadá-yu sá ñà túú tàú-yu cadá-yu.

6 Te tnúhu cǎháⁿ-í-a quèe-xi sá tée ndihí ñadìhí cuu candeca tnàhá-yu dico ñá túú quide yica-í sá dúcáⁿ càdá-yu. 7 Te yúhú sání iní-í sá núu ðicó sá cúú te nchaa-ndo cùndecu-ndo datná ndécù-í, dico ñáhá chi mee Yá Ndiöxí ní cachí-gá nàcuáa nduu táhú-ó ìⁿ ìⁿ-o cundecu-o, chi dava-o ní cutáhú-ó núú-gǎ sá cùndècu ñadìhí-ó te dava-o ñáhá. 8 Te càchí tnúhu-í xii nchòhó cue téé vátá ñihí-gá ñadìhí-xi sá vǎha-gá sá núu vá cùndècu ñadìhí-ndó dàtná yúhú. Te ducaⁿ-ni nchòhó cue ñáyiú ðìhí ñáyiú vátá ñihí-gá yíi-xi sá vǎha-gá sá núu vá cùndècu yíi-ndo. Te ðiu-ni duha cǎháⁿ-í sá cúú-xí nchàa nchohó ñáyiú ðìhí ní quendóo quèé sá vǎha-gá sá núu vá cándèca-gá-ndó tée. 9 Te càchí tnúhu-í xii nchaa-ndo sǎ núu xìto-ndo sá vǎ cùndèe iní-ndó cùndecu mee-ndo te vǎha-gá sá núu

tnándaha-ndo, te ñá díú sǎ méé-ní cànì cuehé canì duha iní-ndó cùndecu-ndo.

¹⁰ Te nchaa nchòhó ñáyiù sa ní tnándaha càháⁿ-í dóho-ndo, te ñá díú mèe-í duha càhu iní-í càháⁿ-í dóho-ndo chi Xítohó Jesucristú ducaⁿ dàcahu iní ñáhá-gǎ xii-í, chi mee-gǎ cuìní-gǎ cada-ndo nàcuáa na càháⁿ-í-a. Te nchaa nchòhó cue ñáyiù dìhí càháⁿ-í dóho-ndo sǎ vǎ dáñá-ndó yìi-ndo. ¹¹ Te núu ío dava-ndo sà ní dáñá-ndó yìi-ndo, te xìni ñuhu-xi sá vǎ cándeca-gǎ-ndó tée, chi cundecu mee-ñá-ndó àdi núu ñáhá te naqueheⁿ tucu-ndo tée ní cuu yìi-ndo. Te nchaa nchòhó cue tée ndècu ñadihí-xi càháⁿ-í dóho-ndo sǎ vǎ dáñá-ndó ñáyiù cùu ñadihí-ndó.

¹² Te tnúhu na càháⁿ-í-a cùu-xi sá nǐ sani iní mèe-í te ñá díú tnúhu sá nǐ cachí Xítohó Jesucristú cáháⁿ-í cúu-xí. Te núu dava nchòhó cue tée ndècu ichi Xítohó Jesucristú ndécá-ndó ñáyiù dìhí ñáyiù ñá túú ndècu ichi-gǎ, te vǎ dáñá-ndó-yu te núu cùu váha iní-yu ndèca ñahá-yu xii-ndo. ¹³ Te núu dava nchòhó cue ñáyiù dìhí ñáyiù ndècu ichi Xítohó Jesucristú ndécá-ndó cuè tée ñá túú ndècu ichi-gǎ te vǎ dáñá-ndó-güedě te núu cùu váha iní-güedě ndécá ñaha-güedě xii-ndo. ¹⁴ Te núu ìⁿ tée ñá túú sàndáá iní-dé Xítohó Jesucristú te ñadihí-dé sàndáá iní ñáhá-áⁿ xii-gǎ, te tée-áⁿ nǐ cuu-dé ìⁿ tée sa ní cuyatni tnahá tnúhu ndihí ñaha xii-gǎ sá cuendá ñadihí-dé. Te ducaⁿ sǎtnahá-xi cùu tucu ñadihí ñá túú sàndáá iní ñáhá xii Xítohó Jesucristú te yìi-aⁿ sàndáá iní ñáhá-dě xii-gǎ, te ñaha-áⁿ sa ní cuyatni tnahá tnúhu-aⁿ ndihí-gǎ sá cuendá yìi-aⁿ, te diu-ni ducaⁿ sǎtnahá-xi cùu cue landú-yu chi sa ní cuyatni

tnahá tnúhu-güexi ndihí-gá. Te núu vá dúcáⁿ cùu te cue landú-yu-áⁿ ño xica cùndecu-güexi núu-gă. ¹⁵ Te núu ñⁿ tée ñá túú sàndáá iní ñáhá xii Xítóhó Jesucristú cuíní-dé dañá tnàha-dé ndihí ñadihí-dé ñaha sàndáá iní ñáhá xii Xítóhó Jesucristú, te ñiu-ni na càda-dé nàcuáa sàni iní-dé. Te ñiu-ni ducaⁿ tùcu te núu ñadihí ñaha ñá túú sàndáá iní ñáhá xii Xítóhó Jesucristú cuíní-aⁿ dañá-aⁿ tée sàndáá iní ñáhá xii-gá, tée cùu yii-aⁿ te ñiu-ni na càda-aⁿ nacuáa sàni iní-aⁿ. Chi tée sàndáá iní ñáhá xii Xítóhó Jesucristú ñá túú tàú-dé cada yica-dě ñadihí-dé cundecu ndihí ñaha-aⁿ xii-dé te núu ñá túú cuíní-aⁿ. Te ñiu-ni ducaⁿ ñadihí ñaha sàndáá iní ñáhá xii-gá ñá túú tàú-aⁿ cada yica-aⁿ cùndecu ndihí ñaha yii-aⁿ xii-aⁿ te núu ñá túú cuíní-dé cundecu ndihí ñaha-dě xii-aⁿ, chi Yá Ndiöxí cuíní-gá sá ncháá nchòo ñáyiú ndècu ichi-gá cundecu váha-o vă nàá-ó. ¹⁶ Chi cue tée sàndáá iní tnúhu Xítóhó Jesucristú ñá túú cùtnuní iní-güedé te núu ndacu-güedé canu ichi-güedé ñadihí-güedé ichi-gá àdi ñáhá te núu ñá túú sàndáá iní ñáhă-yu xii-gá, te ducaⁿ-ni cue ñáyiú ñihí sàndáá iní tnúhu Xítóhó Jesucristú ñá túú cùtnuní iní-yu te núu ndacú-yu canu ichí-yu yii-yu ichi-gá àdi ñáhá te núu ñá túú sàndáá iní ñáhá-güedé xii-gá.

¹⁷ Te duha na càchí tnúhu-í xii-ndo, nchaa chùuⁿ ní nduu táhú-ndó nùú Yă Ndiöxí quidé-ndó ndèe cùtnàhá ní cáháⁿ ñáhá-gă xii-ndo ñi natuha-ndo ichi-gá te ñiu-ni chùuⁿ-áⁿ cada-ndo cùndecu-ndo. Te nchaa xichi núu tàcá ñáyiú dàcuaha tnúhu-gá ñiu-ni duha càháⁿ-í dóho-yu. ¹⁸ Te nchaa cue tée ndècu seña ñii-xi dàtná ní cachi ndíi Moisés, cue tée ní cáháⁿ Yă Ndiöxí ndécú ichi-gá, te ñiu-ni ducaⁿ

cùnduu-güedé cundecu-güedé, te nchaa cue téé ñá túú ndècu seña ñi-xi ní cáháⁿ-gá cundecu ichi-gá, ñi-ni ducaⁿ cùnduu-güedé cundecu-güedé vá cuãha-güedé seña ñi-güedé. ¹⁹ Te ñi-ni cùu-xi cuéi na cuãha-o seña ñi-o àdi vá cuãha-o. Te sá ño-gá xíni ñùhu-xi cada-o xíãⁿ cúú-xí sã cádá-ó nchàa nacuaa cuíni Yá Ndiõxí. ²⁰ Chi xini ñuhu-xi sá cùndècu-ni-o datná ndécú-ó cùtnàhá ní cáháⁿ ñáhá Yá Ndiõxí xii-o ní ngúndecu-o ìchi-gá. ²¹ Te núu cùu-ndo ñáyiú ñá túú tnàhí dàñá quee núu chíúⁿ pàtróóⁿ-xi cùtnàhá ní cáháⁿ ñáhá Yá Ndiõxí xii-ndo, te ñá túú nã cani iní-ndó, dico núu dàña ñaha patróóⁿ-ndó quèe-ndo núu chíúⁿ-ndó te váha-ni quee-ndo núú chíúⁿ-ndó. ²² Te sáta ní cáháⁿ ñáhá Xítóhó Jesucristú xii nchòhó ñáyiú ducaⁿ ñà túú tnàhí dàñá quee núu chíúⁿ pàtróóⁿ-xi-áⁿ, te ní cuu-ndo datná ñáyiú dàñá queé núú chíúⁿ pàtróóⁿ-xi sá cúú-xí-gã, te ducaⁿ chi ñá túú-gã ndécú-ndó ìchi cuehé ichi duha. Te nchòhó ñáyiú dàñá queé núú chíúⁿ pàtróóⁿ-xi cùu-ndo datná ñáyiú ñá túú tnàhí dàñá quee núu chíúⁿ pàtróóⁿ-xi sá cúú-xí Xítóhó Jesucristú, te ducaⁿ chi xinu cuechi-ná-ndó núú-gã. ²³ Te Yá Ndiõxí ní nduu cuendá ñáhá-gã xii-o chi Xítóhó Jesucristú ní nacháhu-gá nchaa yíca cuèchi-o sã ndécú núú Yá Ndiõxí ní cùu, te vá dáñá-ndó sã tnàha ñáyiú-ndo nàdatuhú iní ñáhã-yu xii-ndo vã cúnú cuèchi-ndo núú Xítóhó Jesucristú nàcuáa tàú-xi cunduu. ²⁴ Te núu xíãⁿ càchí tnúhu-í xii nchaa nchòhó ñáyiú ndècu ndihi-í ichi Xítóhó Jesucristú sá cùndècu-ni-ndo datná-ni ndècu-ndo ndéé cùtnàhá ní cáháⁿ ñáhá-gã xii-ndo, te ñi-ni ducaⁿ cùndecu-ndo ichi-gá.

²⁵ Te càchí tnúhu tucu-í xii-ndo sã Xítóhó Jesu-

crístú ñá túú càchí tnúhu-gá xii-í nũ nása cáháⁿ-í cuendá nchaa ñáyiú vátá tnãndaha-gá. Te duha sàni iní-í cáháⁿ-í cuendá-yu, te nchòhó cuu quíndáá iní-ndó tnũhu càháⁿ-í chí Xítohó Jesucrístú chíndèe chitúu ñaha-gã xii-í. ²⁶ Te yúhú càchí-í sá sã cuendá nchaa tnúndòho tnúhu ndàhú ió ñuyíú-a vitna, te váha-gá sá ncháá ñáyiú te núu nása xíndecú-yu te ducaⁿ-ni na cùndecú-yu. ²⁷ Te nchaa cue téé ndècu ñadihí-xi te ducaⁿ-ni na cùndecu-güedé ndihí-yu, te nchaa cue téé ñá túú ñàdihí-xi te ducaⁿ-ni na cùnduu-güedé vá ndúcú-güedě ñadihí-güedé. ²⁸ Dico nchaa cue téé na ndùcu ñadihí-xi te ñá díú ñⁿ cuéchi cùu-xi sá dúcáⁿ ná ndùcu-güedé ñadihí-güedé, te diu-ni ducaⁿ cùu tucu cue ñáyiú dihí te núu na nihí-yu yí-yu chí ñá díú ñⁿ cuéchi cùu-xi sá dúcáⁿ ñihí-yu yí-yu. Te núu cue téé na nihí-güedé ñadihí-güedé te nándi ndohó-yu cundecú-yu ñuyíú-a, te núu xíãⁿ duha càháⁿ-í cuendá sá vã ndúcú-güedě ñadihí-güedé cuendá sá vã ndóhõ-yu.

²⁹ Te nchaa nchòhó ñáyiú ndècu ndihí-í ichi Xítohó Jesucrístú na càchí tnúhu-í xii-ndo sã ñá túú-gã vài nduu cumání te quixi tucu Xítohó Jesucrístú, núu xíãⁿ xíní ñùhu-xi sá ndèe vitna ngüíta nchaa cue téé ndècu ñadihí-xi cada-güedé chiunⁿ Xítohó Jesucrístú, te cada-güedé dàtná sá ñà túú ñàdihí-güedé. ³⁰ Te nchaa ñáyiú ndihú iní-xi te na càda-ní-yu sá ñà túú ndihú iní-yu cadá-yu chiunⁿ Yá Ndiõxí. Te nchaa ñáyiú cùdíí iní-xi te na càda-ní-yu sá ñà túú cùdíí iní-yu cadá-yu chiunⁿ-gá,

te nchaa ñáyu ndècu ndìhi nándi sá ndécú ndìhi te na càda-ní-yu sá ñà túú ñă ndécú ndìhí-yu cadá-yu chiuⁿ-gá. ³¹ Te nchaa ñáyu nèhe chiuⁿ nchaa sá ío ñuyíú-a te na càda-ní-yu cuendá sá ñà túú ñă néhé chiúⁿ-yu cadá-yu chiúⁿ Yá Ndiöxí, chi nchaa sá ío ñuyíú-a sa ñùhu-xi ichi cuáháⁿ-xi núú ndíhí ñhnu-xi.

³² Te cuení-í sá vă cúhúⁿ ñní-ndó năndi sá ío ñuyíú-a, te ni ñà túú tnáhí ná cani iní-ndó cùndecu-ndo, chi nchaa cue téé ndècu ichi Xítóhó Jesucristú xíndecu mee ío ñùhu iní-güedé cada-güedé chiúⁿ-gá nàcuáa cudíu-güedé núú-gă.

³³ Te nchaa cue téé sa ndècu ñadìhí-xi cue téé ndècu ichi-gá ñùhu iní-güedé nàcuáa cada-güedé cundecu-güedé ñuyíú-a cuendá ducaⁿ cùdiu-güedé núú ñadìhí-güedé. ³⁴ Te diu-ni ducaⁿ cùu tucu cue ñáyu dìhí chi ñà túú ñⁿ-ni cuu ñáyu sa ndècu y^h-xi ndìhi ñáyu vátá cùndecu-gá y^h-xi, chi ñáyu ndècu ichi Xítóhó Jesucristú ñà túú ndèca téé ío ñùhu iní-yu cadá-yu chiúⁿ-gá nàcuáa ñhíí ní ndúŷ-yu cundecu y^hñuhú-yu núú Yă Ndiöxí, dico cue ñáyu dìhí ndécá tēe ndècu ichi-gá ío ñùhu iní-yu nàcuáa cundecú-yu ñuyíú-a cuendá cudíu-yu núú y^h-yu.

³⁵ Te duha càháⁿ-í cuendá cúú-xí ñⁿ sá văha xii-ndo, te cudíu núú tnáhá-ndó, te cuu-ndo ñáyu cada ndáá núú Xítóhó Jesucristú, te mee-ni-gă cuhuⁿ iní-ndó. Te ñà díú să dúhá càháⁿ-í te quide yica-í sá cadá-ndó nàcuáa càháⁿ-í.

³⁶ Te núú ío ñaya-ndo sàni iní-ndó să ñà túú ndùu váha-xi sá ío cuu sacuéhé ñēhe yoco-ndo cùndecú-yu ña, te núú sàni iní-ndó să văha-gá candecá-yu téé te cada-ndo nàcuáa sàni iní-ndó,

chi ñá díú ñⁿ cuéchi cùu-xi. ³⁷ Te núu dava-ndo ndècu déhe yoco-ndo, te vá yõ ñⁿ cada yica ñaha xii-ndo sá cándecá-yu téé. Te núu mee-ndo sàni váha iní-ndó nàcuáa cada-ndo, te núu vá dásáⁿ-ndó dèhe yoco-ndo càndeca ñaha téé te quìde váha-ndo sã dúcáⁿ quìde-ndo. ³⁸ Te nchaa ñáiyu dàsaⁿ déhe yoco-xi càndeca ñaha téé te váha-ni quidé-yu, te nchaa ñáiyu ñá túú dàsaⁿ déhe yoco-xi càndeca ñaha téé te váha-gá tucu quidé-yu sá dúcáⁿ quidé-yu.

³⁹ Te nchaa ñáiyu dìhí ndécú yì-xi xini ñuhu-xi sá cúndècu-ní-yu ndihí yí-yu nini ndècu vívú-güedé chi ducaⁿ càháⁿ tnúhu sá dánèhé ñáhá xii-o nacuáa cada-o cùndecu-o, dico núu na cuú-güedé te cuu naquehéⁿ-yu ingá téé candecá-yu dícó-ni sá diu-ni téé ndècu ichi Xítóhó Jesucristú. ⁴⁰ Te yúhú sání iní-í sá ño-gá váha cundecú-yu te núu vá nándúcú-yu ingá téé candecá-yu, te duha càháⁿ-í chi Espíritú Yã Ndiõxí ducaⁿ dàcahu iní ñáhá-xí xii-í cáháⁿ-í.

8

Cuendá nchaa sá nchító-ó sãñaha ñáiyu ndùu táhú nchaa sá càchí-yu cùu ndióxí

¹ Te vitna na càháⁿ-í cuendá nchaa sá nchító-ó sãñaha ñáiyu ndùu táhú nchaa sá càchí-yu cùu ndióxí te ñá ndàá chi dícó ndaha cue tee ñuyíú-a ní cuáha nchaa xíãⁿ. Te nchoo sa cùtnuní váha iní-ó cuendá nchaa xíãⁿ, dícó-ni sá cuendá nchaa sá cùtnuní váha iní-ó xíãⁿ quidé càhnu-o mee-o, dico núu cùu iní-ó tnàha ñáiyu-o te canu ichi-õ-yu ichi váha. ² Te núu dava-ndo sàni iní-ndó sã túha-ndo dico cùu-ndo ñáiyu vátá cútúha-gá nàcuáa tàú-xi cunduu. ³ Te núu nchòhó cúú iní-ndó Yã Ndiõxí te mee-gã cáháⁿ-gá sá cúú-ndó ñáiyu cùu cuendá-gá.

4 Te vitna na càchí tnúhu-í xii-ndo nàcuáa ndùu cuendá nchaa sá nchító-ó sãñaha ñãyiu ndùu táhú nchaa sá càchí-yu cùu ndióxí te ñá ndàá chi dícó ndaha cue tée ñuyíú-a ní cuáha nchaa xíãⁿ. Te nchoo cùtnuní iní-ó sã ncháá sã càchí ñãyiu cùu ndióxí cadúha-yu ñuyíú-a ñá túú cùu-xi ndióxí, chi ìⁿdii díí-ni Yá Ndiöxí ndécú. 5 Te cue ñãyiu ñuyíú-a càchí-yu sá cuëi andiu te cuëi ñuyíú-a ndècu titní ndiöxí. Te ndáá sá ndëni ní cuu ndècu espíritu sá càchí ñãyiu cùu ndióxí te ñá ndàá sá ndiöxí cúú-xí, te nchaa xíãⁿ táxí tnùnì ñáhá-xí xíi-yu. 6 Te nchoo cùtnuní ndáá iní-ó sã ìⁿdii díí-ni Yá Ndiöxí ndécú te diu-gá cúú-gá Tátá-ó, te nchoo cùu-o ñãyiu cùu cuendá-gá. Te diu-ni mee-gã ní táúchíúⁿ-gã ní cuáha nchaa sá ió ñuyíú-a, te cùtnuní tucu iní-ó sã ìⁿdii díí-ni Xítóhó Jesucristú ndécú, te Yaá-áⁿ ñí quide-gá nchaa chiuⁿ ní táhú Dütú Ndiöxí ní cadúha-gá nchaandi túhú sá ió ñuyíú. Te diu-ni mee Xítóhó Jesucristú quidé ndècu-o ichi-gá vitna.

7 Te ñá ncháá nchòhó ñãyiu ndècu ichi Xítóhó Jesucristú cùtnùnì iní-ndó nàcuáa ndùu tnúhu càháⁿ-í. Chi sa ní cáaⁿ-ndo quide cahnu-ndo nchaa sá càchí-yu cùu ndióxí ní cùu. Te cuendá xíãⁿ nũu nàqueheⁿ-ni-ndo nchaa sá nchító-ó ndùu táhú nchaa sá càchí-yu cùu ndióxí-áⁿ xéxí-ndó, te sàni-ni iní-ndó sã quidé cahnu-ndo nchaa sá càchí-yu cùu ndióxí-áⁿ te ñá ndàá sá ndiöxí cúú-xí. Te núu sàni iní-ndó sã ñá túú vãha caxi-ndo sã dúcáⁿ ndùu táhú-xi-áⁿ te xèxi-ndo te xíãⁿ ñá túú cùu vãha iní-ndó cuendá sá dúcáⁿ quide-ndo. 8 Te ñá díú nchàa sá xéxí-ó quide-xi cudiu-o núú Yã Ndiöxí, chi ìⁿ-ni quide-xi cuëi na cãxi-o àdi vá cáxí-ó chi ni ìⁿ sá cáxí-ó vã chindèe ñaha-xi cudiu-o núú Yã

Ndiöxí. Te cuëi vá cáxí-ó dico ñá díú xǎⁿ cada sá vǎ cúdiu-o núu-gǎ. ⁹ Te cuu-ni caxi-ndo nchàa nání nìhí-ndó. Te dicó-ni sá càda cuendá-ndó sǎ ñà díú cuendá sá xéxí-ndó-ǎⁿ cuíta nihnu dava ñáyiú ndècu ndìhi-ndo ichi Xítóhó Jesucrìstú cadá-yu nándi sá cádá-yu nàcuáa vá cúú vǎha iní Yǎ Ndiöxí chi ñáyiú-áⁿ ñà túú cùtnuní iní-yu. ¹⁰ Te nchòhó ñáyiú xìní váha cuendá nchaa sá càchí-yu cùu ndióxí, te núu na quìhíⁿ-ndó núú ndécú nchàa xíaⁿ te ngóo-ndo càxi-ndo nchaa sá ñí cutáhú-xi, te quíní ñáyiú ndècu ndìhi-ndo ichi Xítóhó Jesucrìstú, ñáyiú vátá cùtnùní-gá iní-xi nàcuáa ndùu cuendá nchaa sá dúcáⁿ càchí-yu cùu ndióxí-áⁿ, te cuëi sàni iní-yu sá ñà túú quìde váha-ndo sǎ dúcáⁿ quìde-ndo te cudana te cada yìcá-yu caxí-yu tnàhá-yu nchaa sá dúcáⁿ ñí nduu táhú nchaa sá càchí-yu cùu ndióxí-áⁿ te ñá ndàá sá ndiöxí cúú-xí. ¹¹ Te núu ducaⁿ cùtnuní iní-ndó nàcuáa ndùu cuendá nchaa xíaⁿ te ducaⁿ quìde-ndo, te sá dúcáⁿ quìde-ndo-áⁿ te dàcuíta nihnu-ndo dàva-gá ñáyiú ndècu ndìhi-ndo ichi Xítóhó Jesucrìstú, ñáyiú vátá cùtnùní-gá iní-xi nàcuáa ndùu cuendá nchaa xíaⁿ, te diu cuendá tnàhá ñáyiú-áⁿ ñí xíhí Xítóhó Jesucrìstú. ¹² Te sá dúcáⁿ quìde-ndo-áⁿ cúú-xí ìⁿ cuéchi núú Xítóhó Jesucrìstú, chi quìde-ndo nacuáa xínu iní-yu cadá-yu ìⁿ sá sání iní-yu ñá túú vǎha, núu xíaⁿ ñá túú quìde váha-ndo sǎ cúú-xí-yu. ¹³ Te núu yúhú cùtnùní iní-í sá sǎ cuendá ìⁿ sá cáxí-í te ngóo ìⁿ ñáyiú ndècu ndìhi-í ichi Xítóhó Jesucrìstú cadá-yu ìⁿ sá vǎ cúú vǎha iní Yǎ Ndiöxí, te váha-gá sá vǎ cáxí-gǎ-í xíaⁿ cuendá sá vǎ cádá-yu ìⁿ sá vǎ cúú vǎha iní-gá.

9

Nchaa sá cúú càda cue téé ní táúchíúⁿ Xítóhó Jesucristú cáháⁿ tnúhu-gá

¹ Te yúhú chi cuu cada-í nchaa sá sání iní-í, chi tnàhá-í ní táúchíúⁿ Xítóhó Jesucristú cáháⁿ-í tnúhu-gá núú ñáyiú. Te yúhú ní xiní núú-í Xítóhó Jesucristú Yaá cúú Xítóhó-ó te nchòhó cúú-ndó ñáyiú ní sándáá iní tnúhu-gá sá càháⁿ-í te ducaⁿ chi ndècu ndihí-í-gá. ² Te ió dava ñáyiú ñá túú sándáá iní-yu sá Xítóhó Jesucristú ní táúchíúⁿ-gã cáháⁿ-í tnúhu-gá, dico nchòhó chi cùtnuní ndáá iní-ndó sã díú-gã ní tendaha ñàha-gá xii-í xicá cùu-í càháⁿ-í tnúhu-gá, te ducaⁿ chi yúhú ní cáháⁿ-í tnúhu-gá núú-ndó te ní sándáá iní-ndó-gã te xíã cùtnuní sá díú-gã ní tendaha ñàha-gá xii-í xicá cùu-í càháⁿ-í tnúhu-gá núú ñáyiú.

³ Te duha ndùu tnúhu càháⁿ-í cuèndá cunedóho nchaa ñáyiú sätnuhu ñaha xii-í. ⁴ Chi yúhú cuu-ni caxi-í nchaa núú sã cúú caxi-o na taxi ñáyiú.

⁵ Te cuu-ni cundecu ñadìhí-í te caca ndeca-í-yu nchaa núú xicá cùu-í càháⁿ-í tnúhu Yá Ndióxi dàtná quidé dàva-gá cue téé càháⁿ tnúhu-gá, ndihí cue téé cùu ñaní Xítóhó Jesucristú, ndihí té Pèlú.

⁶ Te tnàhá yúhú ndihí té Bèé cuu dañà-ndí chiuⁿ quide-ndí te cada-ndí dàtná xiquide dava-gá-güedé càháⁿ-güedé tnúhu Xítóhó Jesucristú. ⁷ Te nchoo xìní-ó sã ncháá cuè sandadú dacuítí sã ñúhú yáhu-güedé xínú cuèchi-güedé, te ñá túú dìcò ducaⁿ xínu cuechi-güedé. Te ducaⁿ sätnahá-xi cùu tucu ñáyiú xìtu ìⁿ sá xítú chi dacuítí nihí-yu ìⁿ sá xítũ-yu xèxí-yu, te ñá díú dìcò ducaⁿ xítú-yu. Te

ducaⁿ cùu tucu cue tée cùu toli chi quìhni-güedé dícu quiti xìto-güedé xìhi-güedé te ñá túú dícó ducaⁿ xìto-güedé-di. ⁸ Te vá cání iní-ndó sǎ sà dúhá càháⁿ-í te càhu iní mée-í duha càháⁿ-í, chi tnúhu càháⁿ-í-a ñⁿ-ni quèe-xi ndìhi tnúhu ní cáháⁿ ndíi Moisés. ⁹ Chi ndíi-áⁿ ñí chídó tnùní ndíi núú tütú ndíi nàcuáa ní xáhaⁿ Yǎ Ndiǒxí xii ndíi, te càchí-xi: “Vá chíhí-ndó ñùnu yuhu ndicutu oré dánchezí-di triú”, duha càchí-xi núú tütú ndíi. Te ñá díú sǎ dúcáⁿ ñí cáháⁿ Yǎ Ndiǒxí te càháⁿ-gá mee-ni cuendá ndicutu-áⁿ. ¹⁰ Chi ní cáháⁿ-gá cuendá nchoo cuè ñáyiú ndècu ichi-gá, te ndáá sá díú cuendá-ó dùcaⁿ ní cáháⁿ-gá. Te nchaa cue tée xìtu chihi tatá sàni iní-güedé sá díú tàtá chíhí-güedě-áⁿ cuu sá cáxí-güedě, te diu-ni ducaⁿ cùu tucu cue tée xǐcani triú chi càni-güedé cuendá quee caxi-güedé. ¹¹ Te ducaⁿ sǎtnahá-xi cùu nchúhú cue tée càháⁿ tnúhu Xítóhó Jesucristú, chi dànehé ñáhá-ndí xii-ndo cuendá nchaa sá vǎha quìde ñaha Yá Ndiǒxí xii-o, núu xǐáⁿ dai tàú-xi sá nchòhó chindee ñàha-ndo xii-ndí nùu ná cúú sǎ xíní ñùhu-ndí. ¹² Te núu dava cue tée càháⁿ tnúhu Yá Ndiǒxí chíndèe-ndo-güedé, te uuⁿ-gá ducaⁿ tàú-ndó chindee-ndo nchúhú cue tée ní sanu ichi ñaha xii-ndo ichi-gá.

Te cuèi tàú ndisa-ndo sǎ chíndèe ñaha-ndo xii-ndí dico ñá túú dùcaⁿ caháⁿ-ndí núú-ndó càda-ndo, te quìde cahnu iní-ndí cuèi nándí sá tá yǎha-ndí véxi. Te ducaⁿ quìde-ndí cuendá sá ñà túú ñá cani iní ñáyiú cuendá-ndí te ducaⁿ cuíta cuténuu-gá tnúhu sá càháⁿ nàcuáa naníhí tàhú-ó quǐhíⁿ. ¹³ Te nchòhó xíní-ndó sǎ ncháá cuè tée xìnu cuechi veñúhu diu-ni xǐáⁿ ñíhí-güedé xéxí-güedě,

te ñu-ni cue tée-án xínú cuèchi-güedé núú xihí quiti ndùu tǎhú Yǎ Ndiǒxí, te ñu-ni xián nihí tucu-güedé sá xéxi-güedé. ¹⁴ Te ñu-ni ducaⁿ sǎtnahá-xi cùu nchúhú cue tée cǎháⁿ tnúhu sá cǎháⁿ nǎcuáa naníhí tǎhú-ó, chi Xítohó Jesucristú ní cachí-gá sá ñú-ní cuendá chiúⁿ quide-ndí níhí-ndǐ caxi-ndí. ¹⁵ Te ñá ñⁿ ndùu cǎháⁿ-í núú-ndó càda-ndo nacuáa tàú-xi cunduu sá cúu-xi-í, te vá cání iní-ndó sǎ sá dúhá cǎháⁿ-í te ñⁿ sá xicáⁿ-í núú-ndó. ¡Chi cuèi na cùú-í sá ndóhò-í te ñá ñú sǎ cǎháⁿ ñáyiú sá sǎ cuendá sá cǎháⁿ-í tnúhu Xítohó Jesucristú nihí-í xéxi-í!

¹⁶ Te yúhú ñá túú quide cahnú-í mée-í sá cǎháⁿ-í tnúhu sá cǎháⁿ nǎcuáa naníhí tǎhú-ó, chi tàú tnàhá-í sá càdà-í chi ducaⁿ ñí cachí Yǎ Ndiǒxí cada-í. ¡Te ndàhú ní cuu yúhú te núu vá cǎháⁿ-í tnúhu-án! ¹⁷ Te ñá túú cǎháⁿ-í tnúhu-gá sá cúú iní mée-í chi mee-gǎ ní táuchíúⁿ-gǎ cǎháⁿ-í tnúhu-gá. Te núu cǎháⁿ-í tnúhu-gá sá cúú iní mée-í te tàú-í níhí-í sá ndúú tǎhú-í ní cùu. ¹⁸ Dico sá sà ní nduu tǎhú-í cúu-xí sǎ ño cùú ñí iní-í sá ñíco ducaⁿ cǎháⁿ-í tnúhu sá cǎháⁿ nǎcuáa naníhí tǎhú-ó. Te cuèi tàú-í queheⁿ-í sá táxi-ndó ndùu tǎhú-í sá cuendá sá cǎháⁿ-í tnúhu Xítohó Jesucristú, dico ñá túú dùcaⁿ quide-í. ¹⁹ Te sá dúcáⁿ ñíco ducaⁿ cǎháⁿ-í tnúhu sá cǎháⁿ nǎcuáa naníhí tǎhú-ó, xián ni ñⁿ ñáyiú ñuyíú-a vá cúu cǎchí-yu sá táxi tnùní ñǎhǎ-yu xii-í, te cuèi ducaⁿ dico mee-í ní sani iní-í sá cùú-í ñátná ñⁿ tée xínu cuechi núú nchàa ñáyiú cuendá ducaⁿ cuíta cuu vaí-yu tuhá-yu ichi Xítohó Jesucristú quíhíⁿ. ²⁰ Te òré ñúhú tnàhí tnuú cue ñáyiú isràél te quide-í sá ñⁿ-ní cùu-í ndihí-yu cuèi ñá túú nchícúⁿ nihnu-í tnúhu ní cǎháⁿ ndíi Moisés, te ducaⁿ quide-í cuendá sá ñáyiú-án quíndáá iní-yu tnúhu cǎháⁿ-í te

tuhá-yu ichi Xítohó Jesucrìstú. ²¹ Te òré ñúhú tnàhí tnuú nchaa ñáyiú ñá túú nchìcúⁿ nihnu tnúhu ní cáháⁿ ndíi Moisés, te quìde-ni-í sá quidè-í dàtná quidé mèe-yu cuèndá quíndáá iní-yu tnúhu càháⁿ-í, te tuhá-yu ichi Xítohó Jesucrìstú. Te cuèi ducaⁿ quide-í dico ñá túú dàña ndeé-í quidè-í nchaa nàcuáa cuìní Yă Ndiöxí cada-o, te ducaⁿ chi nchìcúⁿ nihnu-í quidè-í nchaa nàcuáa càháⁿ Xítohó Jesucrìstú. ²² Te òré ndécù-í ndihì nchaa ñáyiú ñá túú cùtnuní váha iní-xi nàcuáa cundecu ichi Xítohó Jesucrìstú, te tnàhá-í quidè-í dàtná quidè-yu cuèndá sá ná tèdóho-yu nchaa tnúhu càháⁿ-í te ducaⁿ cùtnuní-gá iní-yu nàcuáa cundecú-yu ichi-gá. Te nchaandi túhú ñáyiú quide-í sá ìⁿ-ni cuu-í ndihí-yu cuèndá ducaⁿ ñhì-í nàcuáa cada-í te cundedóho-yu tnúhu càháⁿ-í te tñíⁿ-yu ichi Xítohó Jesucrìstú te naníhí tàhú-yu. ²³ Te duha quide-í cuèndá sá cuítá quíndáá iní-yu tnúhu sá càháⁿ nàcuáa naníhí tàhú-ó quíhíⁿ, te ducaⁿ te tnàhá yúhú ío váha cundecu-í dàtná càháⁿ tnúhu-áⁿ.

²⁴ Te nchòhó sa xìní-ndó sã ncháá cuè tée xínu quíhu màrcúhyú nchaa-güedé xínú-güedě, dico ìⁿ-ni-dé cúú tée ndàcu ngodó núú te tée-áⁿ cúú tée nihí sá ndúú tãhú-xi, te ducaⁿ xìni ñuhu-xi cada nchohó tucu chi cada-ndo ncháa nacuáa cuìní Yă Ndiöxí cada-ndo cuèndá ducaⁿ ñhì-ndó sã ndúú tãhú-ndó. ²⁵ Te nchaa cue tée xìní dadiqui te váha váha quide cuèndá-güedé nũu ná cúú sã cádá tnèñu te xòcani-güedé cuèndá sá ñã díú xĩã cada te cuíta-güedé òré dadiqui-güedé. Te ducaⁿ quide-güedé cuèndá cuìní-güedé níhí-güedě sá ndúú tãhú-güedě, te sá ndúú tãhú-güedě-áⁿ

cúú-xí ñíⁿ sá ndíhí ñìhnu ñuyíú-a. Dico nchoo ndùcu ndee-o quide-o nacuaá ñíhí-ó sã ndúú tãhú-ó, te xíⁿ cudíi-xi cundecu ndíhi-o ñì caa ñì quíhíⁿ. ²⁶ Te yúhú quidè-í dàtná quidé cuè téé xínu, chí cue téé-áⁿ xíní-güedé núú quéxìo-güedé, te quide tucu-í dàtná xíquide cue téé sa ní cutúha naá, te ñá túú quide-í dàtná quidé cuè téé vitna dàcuaha naá. Te ducaⁿ chí yúhú quidè-í nchaa nàcuáa cuíní Yã Ndiõxí cunduu. ²⁷ Te yúhú ñá túú dàña-í taxi tñùnì ñáhá ñì ñíⁿ sá cuèhé sá dúhá xì-í chí yòtní-í mèé-í. Te ducaⁿ quide-í chí yúhú càháⁿ-í tñúhu Xítóhó Jesucrístú núú ñáyíu, te cuíní-í sá vã cuíta sá ñí cachí Yã Ndiõxí nduu táhù-í.

10

Cuèndá nchaa sá ñí cadúha cue téé ñuyíú-a quide cahnu ñáyíu

¹ Te nchòhó ñáyíu ndècu ndíhi-í ichi Xítóhó Jesucrístú na càchí tñúhu-í xii-ndo cuèndá nchaa ñaní tñáhá-ndí ñáyíu isràél ní xíndecu ndéé sanaha, chí vitna tñáhá nchòhó cúú-ndó dàtná cue ñaní tñáhá nchaa ñáyíu-áⁿ chí ndècu-ndo ichi-gá. Te nchaa ñáyíu-áⁿ ñì taxi ndecu Yá Ndiõxí ñíⁿ vícò ñí dánèhé ñáhá-xí xíi-yu ichi quíhíⁿ-yu, te ní quée dava ndute lámár nání Mãr Tícuèhé te nchaá-yu ní yáha-yu. ² Te sá dúcáⁿ ñí cuu te nchaá-yu ñíⁿ-ná ní cuú-yu ndíhi ndíi Moisés, te ní xíhi ndaha ñàha ndíi xíi-yu. ³ Te nchaá-yu ní xexí-yu sá ñí sáñaha Yã Ndiõxí xíi-yu. ⁴ Te ducaⁿ nchaa tucú-yu ní xihí-yu ndute sá ñí sáñaha-gã xíi-yu, ndute sá ñí quee yiqui ñàha cava. Te cava-áⁿ cada iní-ó sã cúú-xí dàtná Xítóhó Jesucrístú te ducaⁿ chí ndíhi ñàha-gã xíi-yu

ichi cuáháⁿ-yu dàvá-áⁿ. ⁵ Dico ío vai-yu ñá túú ní quidé-yu nàcuáa càháⁿ Yă Ndiöxí, te xiăⁿ ñá túú ní cùu váha iní ñáhá-gă xií-yu. Te sá dúcáⁿ nĩ quidé-yu núu xiăⁿ òré ñúhũ-yu ichi cuáháⁿ-yu xití yucu ío vai-yu ní xihí.

⁶ Te ducaⁿ nĩ cuu cuèndá nchoo vă cãchĩcúⁿ nihnu-o càda-o nacuáa ní quidé-yu, chi ñáyiu-áⁿ mee-ni nchàa sá cuèhé sá dúhá nĩ sani iní-yu ní quidé-yu. Te nchoo xini ñuhu-xi sá vă dúcáⁿ càda-o. ⁷ Te yúhú càháⁿ-í dóho-ndo sã vă quìndáá iní-ndó te ni vă cáda càhnu-ndo ni ìⁿ sá cãchĩ-yu cùu ndiöxí ní cadúha cue téé ñuyíú-a dàtná ní quide cue ñaní tñáhá-ndĩ ní xíndecu ndéé sanaha. Chi ñáyiu-áⁿ nĩ quidé-yu dàtná càháⁿ-xi núú tùtú Yă Ndiöxí núú cãchĩ-xi: “Nchaa ñáyiu ní xexí-yu ní xihí-yu ní quidé-yu vico, ní quide cãhnú-yu sá cãchĩ-yu cùu ndiöxí ní cadúha-yu te ñá ndàá sá ndiöxí cúú-xí”, duha cãchĩ-xi núú tùtú-gá. ⁸ Te ni vă cùndecu-ndo ichi dǐí iní dàtná ní quide dava ñáyiu-áⁿ, chi sá dúcáⁿ nĩ quidé-yu te ní xihí ócó úní mĩl-yu ìⁿ-ni ndùu. ⁹ Te vá cání iní-ndó sã sà cãhnú iní Yă Ndiöxí te nãndi sá cuèhé sá dúhá càda-ndo cuendá cuìní-ndó quìní-ndó núu nása cada ñaha-gă xii-ndo, chi ñáyiu ní xíndecu ndéé sanaha-ãⁿ ducaⁿ nĩ xóo cáda-yu, te ní xihí-yu ní xexihaⁿ cõó. ¹⁰ Te ni vă càháⁿ cuèhé-ndó cuèndá Yă Ndiöxí, chi dava ñáyiu ní xíndecu ndéé sanaha-ãⁿ ducaⁿ nĩ quidé-yu ní cáháⁿ cuèhé-yu cuèndá-gá te ní quixi espíritú xínú cuèchi núú-gă ní sahní ñaha-xi xií-yu.

¹¹ Te ducaⁿ nĩ cuu te ducaⁿ nĩ ngúndéé núú tùtú Yă Ndiöxí cuèndá dacuàha-o vitna ta cuyatni nduu naa ñuyíú-a. Te nchaa tñuhu sá nĩ ngódó tñuní-áⁿ

càháⁿ dóho ñaha-xi xii-o cuendá sá vǎ cáda-ó dàtná ní quide ñáyi-u-áⁿ. ¹² Te xiǎⁿ nũ nchaa nchòhó ñáyi-u sàni iní sá ïo váha cùndáá ndécú ìchi Xítóhó Jesucristú cada cuendá-ndó sǎ dúcáⁿ-ní cùndáá-ndó nũú-gǎ, te vá dáná cuendá-ndó càda-ndo sá ñà túú cùu váha iní Yǎ Ndiǒxí. ¹³ Te ðiu-ni dàtná quidé sàcuíhná dácàháⁿ-xi iní nchaa dava-gá ñáyi-u nándi quidé-yu, te ðiu-ni ducaⁿ quide ñaha-xi xii-ndo. Dico mee Yǎ Ndiǒxí cúú-gǎ Yaá quidé ndǎá chi quide-gá nchaa sá càháⁿ-gá, te ñǎ dáǎ-gǎ sá sũúni cuídó sàcuíhná coto ndeé ñáhá-xi xii-ndo, chi není-ni nàcuáa cùndee iní-ndó dàña-gá ducaⁿ quide ñaha-xi xii-ndo. Te ðiu-ni-gá chindee ñàha-gá xii-ndo cùndee iní-ndó vǎ cáda-ndó cuèi nándi sá ná dàcahu iní ñáhá-xi xii-ndo.

¹⁴ Te xiǎⁿ nũ càháⁿ-í dóho nchòhó ñáyi-u ío cùu iní-í sá vǎ quìndáá iní-ndó nì ìⁿ sá càchí-yu cùu ndiǒxí te ñǎ ndǎá chi ðicó ndaha cue téé ñuyíú-a ní cuáha nchaa xiǎⁿ, te ni vǎ cáda càhnu-ndo. ¹⁵ Te duha càháⁿ-í chi cùu-ndo ñáyi-u tècú tnùní, te mee-ndo ïo váha cuáha-ndo cuendá te núu váha-ni càháⁿ-í àdi ñǎ túú vǎha-ni. ¹⁶ Te nchoo ndácáⁿ táhú-ó nũú Yǎ Ndiǒxí cuendá ndudí ndéhé yoho yàha stilé sá xihí-ó, te sá dúcáⁿ xihí-ó ndudí ndéhé yoho yàha stilé-áⁿ, te xiǎⁿ ndácú ìní-ó sǎ ìⁿ-ní cùu-o ndihí Xítóhó Jesucristú cuendá sá nǐ sati níñí-gǎ ní xihí-gá núú cùrúxí, te ðiu-ni ducaⁿ sǎtnahá tucu-xi cùu paá sá xéxí-ó òré xihí-ó ndudí ndéhé yoho yàha stilé-áⁿ, chi sá dúcáⁿ xèxi-o paá-áⁿ xiǎⁿ ndácú ìní-ó sǎ ìⁿ-ní cùu-o ndihí Xítóhó Jesucristú sá cuendá yiqui cùñú-gá. ¹⁷ Te cuèi vǎi vihi-o dico ìⁿdi-ni paá xéxí-ó, te sá dúcáⁿ ìⁿdii-ni paá xéxí-ó xiǎⁿ ndácú ìní-ó sǎ ìⁿ-ní cùu-o ndihí Xítóhó Jesucristú.

18 Te cada cuendá-ndó nàcuáa quide ñáyiú isràél, chi ñáyiú-áⁿ xéxí-yu sá ndúú tǎhú Yǎ Ndiǒxí. Te sá dúcáⁿ quidé-yu-áⁿ cútnùní iní-ó sǎ tnàhá tnúhu-yu ndìhi-gá. 19 Te vá cání iní-ndó sǎ sá dúhá càháⁿ-í te cachí-ndó sǎ cùnūu nchaa sá càchí-yu cùu ndióxí ní cadúha cue téé ñuyúú-a chi ñá túú nǎ cúú nì ìⁿ nchaa xǎⁿ. Te diu-ni ducaⁿ cùu tucu nchaa sá sǎñaha ñáyiú ndùu tǎhú-xi chi ñá túú cùnūu-xi, chi ìⁿ-ni cùu-xi ndìhi nchaa dava-gá sá xéxí-ó. 20 Te yúhú càchí-í sá sǎ dúcáⁿ quide nchaa ñáyiú ñá túú tnàhá tnúhu ndìhi Yá Ndiǒxí, te dìcò nchaa espíritú cùndìhi yucu ñávǎha sǎñàhá-yu sá ndúú tǎhú-xi sá dúcáⁿ quidé-yu. Te ñá díú Yǎ Ndiǒxí sǎñàhá-yu sá ndúú tǎhú-gǎ. Te yúhú cuìní-í sá vǎ tnàhá tnúhu-ndo ndìhi cue espíritú cùndìhi yucu ñávǎha. 21 Te ducaⁿ chi vá cúú tnàhá tnúhu-o ndìhi cue espíritú cùndìhi yucu ñávǎha te tnahá tnúhu-o ndìhi Xítóhó Jesucrìstú, te ñá túú ndùu váha-xi ngóo càxi-o coho-o sá ndúú tǎhú cue espíritú cùndìhi yucu ñávǎha-áⁿ, te ngóo càda-o nacuéa ní dándõo tnúhu Xítóhó Jesucrìstú coho-o ndùdí ndéhe yoho yàha stilé, te caxi-o pàá cada-o sǎ ndácú iní-ó sǎ nǐ xíhí-gá núú cùrúxí. 22 Te vá cání iní-ó dùcaⁿ cada-o cuendá sá vǎ cúdééⁿ Yǎ Ndiǒxí, chi ñá túú nǎ càhnu cuu-o núu cada-o nǎni véxi iní méé-ó, chi mee-gǎ ío càhnu cuu-gá.

Cada-o nchàa nacuéa cuu càhnu Yá Ndiǒxí

23 Te ndáá sá ncháá sǎ cuìní-ó càda-o te cuu cada-o dìcò ñá ncháá cùu-xi sá vǎha sá cúú-xí-ó, te nì ñá ncháá-xí chìndee ñaha-xi nacuéa níhí ndéé-gǎ-ó cùndecu-o ichi Xítóhó Jesucrìstú. 24 Te

xìni ñuhu-xi sá cádá-ó sã vãha sá cúú-xí tnàha ñáyiu-o te ñá díú mèe-ni sá cúú-xí mèe-o cada-o.

²⁵ Te nchòhó cuu caxi-ndo nchàa cuñú sá cùyãhu cuñú sá xìní caxi-ndo, te vá ndúcú tnũhu-ndo te núu cùu-xi cuñú sá ñi nduu táhú sã cächí-yu cùu ndióxí. Te ñá túú ñã cani iní-ndó caxi-ndo, ²⁶ chi ñuyíú-a ndihì nchaa sá lò cúú-xí cuendá Yã Ndiõxí.

²⁷ Te núu ññ ñáyiu ñá túú ndècu ichi Xítóhó Jesu-crístú càháⁿ ñãhã-yu xii-ndo quíhíⁿ-ndó caxi-ndo dítá vehé-yu, te núu sàni iní-ndó sã quíhíⁿ-ndó te cuu quíhíⁿ-ndó te caxi-ndo cuëi náí cùu sá táxí-yu dico vá càcáⁿ tnúhú-ndó nũ-yu núu ndéé ní níhí-yu, te ducaⁿ te cuu vãha iní-ndó caxi-ndo.

²⁸ Te núu ññ ñáyiu cächí-yu sá xĩãⁿ cúú-xí sã ñi nduu táhú sã cächí-yu cùu ndióxí te vá caxí-ndó cuendá sá ñáyiu ducaⁿ càháⁿ-áⁿ cuu vãha iní-yu te ñá túú tnàhí ná cani iní-yu. ²⁹ Te yúhú càháⁿ-í cuendá nàcuáa sàni iní méé ñáyiu ducaⁿ càháⁿ-áⁿ te ñá díú sã nàcuáa sàni iní méé-ndó quide-ndo.

Te dava-ndo cächí-ndó: “Cuu-ni cada-o nchàa nacuáa sàni iní méé-ó cuëi dava-gá ñáyiu sàni iní-yu sá ñà túú ndùu vãha-xi sá dúcáⁿ càda-o”, duha cächí-ndó. ³⁰ Te cächí tucu-ndo: “Ñá túú tàú-xi càháⁿ cuèhé ñáyiu cuendá-ó sã cuendá nchaa sá xéxí-ó chi ndàcáⁿ táhú-ó nũú Yã Ndiõxí òré xéxí-ó”, duha cächí-ndó. ³¹ Te cuëi nãndi sá xìní caxi-ndo ñihí-ndó xèxi-ndo àdi quide-ndo, te cada-ndo nàcuáa càháⁿ vãha ñáyiu cuendá Yã Ndiõxí. ³² Te vá cádá-ndó sã ñà túú tàú-ndó càda-ndo cuendá sá vá cádá ñáyiu ññ sá ñà túú cùu vãha iní Yã Ndiõxí. Te ni sã cúú-xí cuè ñáyiu isràél, te ni sã cúú-xí cuè ñáyiu ñá túú cùu ñáyiu isràél, te ni sã cúú-xí cuè ñáyiu ndècu ichi-gá vá dúcáⁿ

càda-ndo sá cúú-xǐ-yu. ³³ Te yúhú ío ndùcu ndee-í quídè-í nàcuáa cudìu-í núú nchàa ñáyiú, te quíde-í sá vǎha sá cúú-xǐ-yu, te ñá túú quíde-í mee-ni sǎ cúú-xí mèe-í. Te ducaⁿ quíde-í cuèndá quíndáá iní-yu tnúhu Xítóhó Jesucristú te naníhí tǎhú-yu.

11

¹ Te chí cáncìcúⁿ nihnu cada-ndo nchàa nacuáa quíde-í nchìcúⁿ nihnu-í nchaa nàcuáa quíde Xítóhó Jesucristú.

Nàcuáa tàú-xi cada nchaa ñáyiú dìhí núú tàcá-yu dàcuahá-yu tnúhu Yá Ndiǒxí

² Te nchòhó ñáyiú ndècu ndìhi-í ichi Xítóhó Jesucristú càchí tnúhu-í xii-ndo sǎ ío cùdǐ iní-í, chí ndàcu iní ñáhá-ndó xii-í, te quíde-ndo nchaa nacuáa ní dánèhé ñáhà-í xii-ndo. ³ Te cuìní-í sá nchòhó cutnùní iní-ndó sǎ ìⁿdii-ni Yá Ndiǒxí cúú-gǎ Yaá cúnùu taxi tnuní ñáhá xii Xítóhó Jesucristú, te ducaⁿ Xítóhó Jesucristú ìⁿdii-ni-gá cúnùu taxi tnuní-gá nchaa cue tée, te nchaa cue tée òu-ni mee-güedé cúnùu-güedé táxí tnùní-güedé ñadìhí-güedé. ⁴ Te núu nchoo cuè tée na dàdáhu-o òⁿdíquí-ó òré càháⁿ-ó núú ñáyiú tnúhu sá dácàhu iní ñáhá Yá Ndiǒxí xii-o àdi oré càháⁿ ndìhi-o-gǎ, te ìⁿsácáⁿnúú cúú-xí te núu ducaⁿ na càda-o dadáhu-o òⁿdíquí-ó. ⁵ Dico núu ñáyiú dìhí vá dádǎhu-yu òⁿdíquí-yu òré càháⁿ ndìhí-yu Yá Ndiǒxí, àdi oré càháⁿ-yu tnúhu sá dácàhu iní ñáhá-gǎ xií-yu núú tnàhá ñáyiú-yu, te sácáⁿnúú cúú-xí te núu vá dádǎhu-yu òⁿdíquí-yu, chí ìⁿ-ni cùu-xi te núu na dèté ndìhí-yu òⁿdíquí-yu. ⁶ Te núu ñá túú cuìní cue

ñáyiú dìhí dàdáhu-yú díquǐ-yú te váha-gá sá ná dèté ndíí-yú díquǐ-yú. Te núú cùcahaⁿ núú-yú sá dèté díquǐ-yú te váha-gá sá ná dàdáhu-yú díquǐ-yú.

⁷ Te nchoo cuè téé vá cúú dàdáhu-o díquí-ó òré càháⁿ ndíhí-o Yá Ndiǒxí ní òré càháⁿ-ó tnũhu sá dácàhu iní ñáhá-gǎ xii-o núú ñáyiú chí díhna-gá-ó ní cadúha ñaha Yá Ndiǒxí xii-o, te ní taxi ndecu-gá nchaa sá xìní tnùní-ó dàtná ndécú nchaa sá xìní tnùní méé-gǎ. Te ducaⁿ ní quide-gá chí cuìní-gá sá nchóó càda-o nacuáa cáháⁿ nchaa dava-gá ñáyiú sá ïo càhnu cuu-gá, te cue ñáyiú dìhí quídě-yú nàcuáa cunuu nchòo cue téé.

⁸ Te Yá Ndiǒxí ní cadúha-gá téé, dico ñá díú yìquí naha ñadìhí ní quenehe-gá ní cadúha-gá téé chí yìquí naha téé ní quenehe-gá ní cadúha-gá ñadìhí.

⁹ Te sá cuendá téé ducaⁿ ní cadúha-gá ñadìhí-áⁿ te ñá díú sǎ cuendá ñadìhí ní cadúha-gá téé.

¹⁰ Núú xǎⁿ tàú-xi sá ncháá ñáyiú dìhí dàdáhu-yú díquǐ-yú cuendá ducaⁿ cùnùní sá ñà túú cùnuú-yú dàtná cùnùu nchoo cue téé. Te ducaⁿ xìní ñuhu-xi cadá-yú sá cuendá nchaa espíritú xínú cuèchi núú Yá Ndiǒxí.

¹¹ Te vitna nchoo ñáyiú ndècu ichi Xítohó Jesucrístú, vá càchí-ó sǎ cuè téé ñá túú xìní ñuhu-güedé cue ñáyiú dìhí chindee ñáhá-yú, te ní vǎ càchí-ó sǎ cuè ñáyiú dìhí ñá túú xìní ñuhú-yú cue téé chindee ñaha-güedé xii-yú.

¹² Te ìⁿ yìquí naha téé ní queñuhu Yá Ndiǒxí ní cadúha-gá ñadìhí, dico vitna chí ñáyiú dìhí dácàcú-yú téé. Te téé, ñadìhí ní cadúha Yá Ndiǒxí, te ñu-ni ducaⁿ ní cadúha-gá nchaa dava-gá sá íó.

¹³ Te mee-ndo càda cuendá-ndó te núú ndùu váha-xi sá vǎ dádǎhu cue ñáyiú dìhí díquǐ-yú òré

càháⁿ ndihí-yu Yá Ndiõxí àdi ñáhá. ¹⁴ Te nchaa ñáyiu càháⁿ-yu sá ñà túú ndùu váha-xi sá cuè tée cunduu nàni idi díquí-güedě, chi ìⁿ sácáⁿnũú cúú-xí cächí-yu. ¹⁵ Te nchaa ñáyiu dìhí ñáyiu nàni idi díquí-xi cächí ñáyiu sá ìⁿ sá vãha cùu-xi sá cúú-xí-yu sá dúcáⁿ nàni idi díquí-yu. Te ducaⁿ chi Yá Ndiõxí ní cachí-gá sá dúcáⁿ cùnduú-yu cuendá quidáhu-xi díquí-yu. ¹⁶ Te núu lò ñáyiu cuèní dacáa cuèndú cuèndá sá ñí cáháⁿ-í-a, te na cùnahá-yu sá ncháá nchũhú cue tée càháⁿ tnúhu Xítóhó Jesucristú ñu-ni ducaⁿ sàni iní-ndí cada nchaa ñáyiu dìhí. Te ñu-ni ducaⁿ sàni iní nchaa ñáyiu ndècu ichi-gá.

Cuendá ñáyiu ñá túú quide datná ní quide Xítóhó Jesucristú cùtnáhá ní cudìni-gá ndihí cue tée ní xica cuu ndihí-gá

¹⁷ Te nchòhó ñá túú quide váha-ndo ndècu-ndo núu xí^a duha na càháⁿ-í dóho-ndo, chi nchòhó òré tàcá-ndó ñá túú quide váha-ndo chi ñá túú chindee tnaha-ndo cada-ndo sá vãha, chi da nàdatuhú iní tnáhá-ndó nàcuáa ndècu-ndo. ¹⁸ Te díhna-gá na cächí tnúhu-í xii-ndo sã ñihí-í tnúhu sá òré tàcá-ndó quide-ndo nacuáa ní cáháⁿ Xítóhó Jesucristú, te ñá túú cùu ìⁿnuu-ndo oré ducaⁿ quide-ndo nacuáa ní cáháⁿ-gá. Te dava sá càháⁿ ñáyiu sandáa iní-í te dava ñáhá. ¹⁹ ;Te ndáa sá dúcáⁿ tnáhí cada-xi vá cúú ìⁿnuu-ndo cuendá ducaⁿ cùnũnĩ nũu ndédacàa-ndo sandáa ndisa iní-ndó tnũhu Xítóhó Jesucristú te ndédacàa-ndo ñáhá! ²⁰ Te ndi tnáhá òré tàcá-ndó quide-ndo datná ní quide Xítóhó Jesucristú cùtnáhá ní cudìni-gá ndihí cue tée ní xica cuu ndihí-gá, te ñá túú quide-ndo

nacuáa tàù-xi cunduu chi cùtexínu-ni quìde-ndo. ²¹ Chi òré tàcá-ndó quìde-ndo nacuáa ní cachí Xítohó Jesucristú, te dava-ndo ngödó núú-ndó díhna-gá-ndó xèxi-ndo sá néhé-ndó te ñá túú sã cùndètu tnaha-ndo, te ñá túú càháⁿ tnáhá-ndó ñũu xíãⁿ dava-ndo ñà túú xèxi-ndo ndahá xití-ndó, te dava-ndo xidó-ndó quìde-ndo chi xíni-ndo. ²² Te vá dúcáⁿ càda-ndo chi càa vehe-ndo núú dúcáⁿ càxi-ndo coho-ndo cada-ndo ndéé ndahá xití-ndó, chi sá dúcáⁿ quìde-ndo te dàquee tíhú-ndó nchàa dava-gá ñáyiú ndècu ndíhi-ndo ichi Yá Ndiöxí, te dándóo canúú-ndó nchàa ñáyiú ndàhú sá dúcáⁿ quìde-ndo. ¡Núu xíãⁿ vá cúú càchí-í sá cúú-ndó ñáyiú quìde váha chi ñá túú quìde váha-ndo sã dúcáⁿ quìde-ndo ndecu-ndo!

Xítohó Jesucristú ní dándóo tnúhu-gá sá cóhó-ó ndùdí ndéhé yoho yàha stilé te caxi-o pàa cuendá ndacu iní-ó sã ñí xíhí-gá

(Mt. 26:26-29; Mr. 14:22-25; Lc. 22:14-20)

²³ Te dàtná-ni ní dánèhé ñáhá Xítohó Jesucristú xii-í te ñiú-ni ducaⁿ ñí dánèhé ñáhà-í xii-ndo, chi ñiú-ni níú cùtnáhá ní sáha cuendá ñáhá ndí Judás Iscarioté xii-gá núú cuè téè cùu úhú iní ñáhá ñí queheⁿ-gá pàa, ²⁴ te ní ndacáⁿ táhú-gã núú Yá Ndiöxí, te ní táhú cuèchi-gá, te ní xáhaⁿ-gã xii cuè téè xica cuu ndíhi-gá: “Chí quéhéⁿ pàa-a caxi-ndo te cada iní-ndó sã cúú-xí dàtná yiqui cùñú-í, chi yúhú cuú-í sácùendá-ndó. Te ducaⁿ-ni càda-ndo cundecu-ndo cuendá ndacu iní ñáhá-ndó xì-í”, càchí-gá xãhaⁿ-gã xii-güedé. ²⁵ Te sátá ñí yàha ní xexi-güedé pàa sã ñí sãñaha-gã, te ní queheⁿ-gá tàsáⁿ ñúhú ndùdí ndéhé yoho yàha stilé, te ní

ndacáⁿ táhú tùcu-gá núú Yă Ndiöxí. Te ní xáhaⁿ-gă xii cue téé xica cuu ndihi-gá: “Chí cóhó ndùdí ndéhé yoho yàha stilé-a, te cada iní-ndó sǎ cúú-xí dàtná níñi-í, te cuendá níñi-í sá cáti òré cuú-í cutnùní ndáá sá Yă Ndiöxí cada-gá ingá núú sǎ vǎha sá cúú-xí ñǎyiu. Te ndi tnahá òré coho-ndo ndùdí ndéhé yoho yàha stilé-án te ndacu iní ñáhá-ndó xii-í, te ducaⁿ-ni càda-ndo cundecu-ndo”, cachí-gá xǎhaⁿ-gă xii-güedé. ²⁶ Te ndi tnahá òré xéxí-ndó pàá te xihí-ndo ndudí ndéhé yoho yàha stilé, te xǎⁿ dátüu-ndo núú ñǎyiu sá Xítóhó Jesucrìstú ní xihí-gá cuendá-yu, te ducaⁿ-ni càda-ndo cundecu-ndo ndéé ná sǎá nduu quixi tucu Xítóhó Jesucrìstú.

Nàcuáa cada-o òré caxi-o pàá ndihi òré coho-o ndùdí ndéhé yoho yàha stilé dàtná ní cachí Xítóhó Jesucrìstú

²⁷ Te dava-ndo ñà túú quide-ndo nacuáa cuèní Yă Ndiöxí cada-ndo òré xéxí-ndó pàá ndihi òré xihí-ndó ndùdí ndéhé yoho yàha stilé, te sá dúcáⁿ quide-ndo-án te cucuéchi xii-ndo chi ñǎ túú nèhe-ndo sá yíñùhu sá cúú-xí yìquì cuñú Xítóhó Jesucrìstú, te ni ñà túú nèhe-ndo sá yíñùhu sá cúú-xí níñi-gă. ²⁸ Te ío váha cada cuendá-ndó te núu ndècu váha iní-ndó núú Xítóhó Jesucrìstú òré cúmǎní-gă caxi-ndo pàá ndihi òré cúmǎní-gă coho-ndo ndùdí ndéhé yoho yàha stilé. Te núu ndècu váha iní-ndó núú-gă te caxi-ndo te coho-ndo. ²⁹ Te dava nchòhó ñǎ túú sàni váha iní-ndó cuendá yìquì cuñú Xítóhó Jesucrìstú te xèxi-ndo paá te xihí-ndo ndudí ndéhé yoho yàha stilé, te nacháhu-ndo sǎ dúcáⁿ ñà túú sàni váha

iní-ndó. ³⁰ Te ðiu sá dúcáⁿ quide-ndo núu xíáⁿ vâi-ndo cuhú, te ío ndàhú ndécú-ndó, te dava ñáyiú ndècu ndìhi-ndo sa ní xíhí-yu. ³¹ Dico núu ío váha sáha-o cuendá nàcuáa ndècu-o núú Yă Ndiöxí, te vâ dúcáⁿ dândoho ñaha-gá xii-o. ³² Te òré ndéhé Yă Ndiöxí sá ñà túú quide ndáá-ó ndècu-o te dândoho ñaha-gá xii-o. Te ðucaⁿ quide-gá cuendá sá vâ cuíta nihnu-o, chi núu ñáhá te cuíta nihnu-o ndìhi nchaa ñáyiú ndècu ichi cuehé ichi duha.

³³ Te núu xíáⁿ càháⁿ-í dóho nchaa nchòhó ñáyiú ndècu ndìhi-í ichi Xítohó Jesucristú sá òré tacá-ndó càda-ndo nacuéa ní quide Xítohó Jesucristú cútnàhá ní cudini-gá ndìhi cue téé ní xica cuu ndìhi-gá, te cundetú tnàha-ndo nduu nchaa-ndo te dătnùní ducaⁿ càda-ndo. ³⁴ Te núu dava-ndo xíhí-ndó dòcó te caxi duuⁿ-ndo vèhe-ndo te dătnùní nataká-ndó, cuendá òré nataká-ndó te vâ cádá-ndó ìⁿ sá ñà túú tàú-ndó càda-ndo cuendá sá vâ dândoho ñaha Yă Ndiöxí xii-ndo. Te òré quixi coto ñaha-í xii-ndo te dàvá-áⁿ cachí tnúhu-í xii-ndo nchàa dava-gá sá cúmăní.

12

Nàcuáa chindee ñaha Espíritú Yă Ndiöxí cada-o ìⁿ
ìⁿ-o

¹ Te nchòhó ñáyiú ndècu ndìhi-í ichi Xítohó Jesucristú cuíní-í cachí tnúhu-í xii-ndo nàcuáa chindee ñaha Espíritú Yă Ndiöxí xii-o ìⁿ ìⁿ-o cuendá cutnùní iní-ndó.

² Te nchòhó sa nàha-ndo sá cŭtnàhá vátá cŭndècu-gá-ndó ichi Xítohó Jesucristú ní xóo dandàhú ñáhá yùcu ñávàha xii-ndo, te ní xóo quíndáá iní-ndó nchàa sá ñí cadúha cue ñáyiú ñuyíú-a nchaa sá càhí-yu cùu ndiöxí te ñá ndàá

sá ndiöxí cúú-xí, te nchaa xíãñ ñá túú càháⁿ-xi.
³ Te cuiní-í sá nchòhó cutnùní iní-ndó sã Espiritú Yã Ndiöxí ñá túú chindee-xi ni ìⁿ ñáyiú cuendá sá càháⁿ úhú-yu Xítóhó Jesucrìstú. Te ni ìⁿ ñáyiú ñá túú càhu iní-yu cáháⁿ-yu sá Xítóhó Jesucrìstú cúú-gã Xítóhó-yu te núu ñá túú Espiritú Yã Ndiöxí dácàhu iní ñáhá-xí xí-yu.

⁴ Te ndi dǐíⁿ ndì dǐíⁿ ndùu chiuⁿ ní cachí Espiritú Yã Ndiöxí cada-o, te ñu-ni ìⁿndi-ni Espiritú-gá ndécú. ⁵ Te ndi dǐíⁿ ndùu chiuⁿ quide-o xinu cuechi-o núu ìⁿndi-ni Xítóhó Jesucrìstú. ⁶ Te ndi dǐíⁿ ndì dǐíⁿ chindee ñaha Yã Ndiöxí xii-o nàcuáa cada-o chiuⁿ-gá, te ñu-ni ìⁿ ñu-gá ndécú chindee-gá nchaa ñáyiú. ⁷ Te Espiritú Yã Ndiöxí quidé-xí sã nchóó càda-o sá vãha, te ducaⁿ chindee-o cue ñáyiú ndècu ndihi-o ichi Xítóhó Jesucrìstú. ⁸ Te dava-o ñi nduu táhú-ó núú Yã Ndiöxí sá Espiritú-gá cada te ndacu-o cáháⁿ-ó tnùhu sá ìo càhu cuu ñu-ni tnùhu mee Yã Ndiöxí, te dava tucu-o ñi nduu táhú-ó cutnùní iní-ó nàcuáa càháⁿ tnùhu-gá te cáháⁿ-ó nàcuáa cuiní Espiritú-gá. ⁹ Te dava tucu-o ñi nduu táhú-ó sã ìo quíndáa iní-ó Xítóhó Jesucrìstú cuendá cada-gá ìⁿ sá cuiní-ó, te ducaⁿ chi Espiritú Yã Ndiöxí chindèe ñaha-xi xii-o. Te dava tucu-o ñi nduu táhú-ó sã càcáⁿ táhú-ní-ó núú Xítóhó Jesucrìstú cuendá ñáyiú cùhú te ndúha-yu. ¹⁰ Te dava tucu-o ñi nduu táhú-ó sã ndácú-ó càda-o nchaa sá vã yõo tnàhí ndàcu cada, te dava tucu-o ñi nduu táhú-ó núú Yã Ndiöxí sá càháⁿ-ó tnùhu sá dácàhu iní ñáhá-gã xii-o, te dava tucu-o ñi nduu táhú-ó sã cútnùní iní-ó núu ñu Espiritú Yã Ndiöxí chindèe ñaha-xi xii ñáyiú òré càháⁿ-yu tnùhu-gá àdi

cue espíritú cúndihí yucu ñávãha. Te dava tucu-o ñí nduu táhú-ó cãháⁿ-ó tnũhu sá dácàhu iní ñáhá Espíritú Yã Ndiõxí xii-o tnũhu sá ñà túú xìní-ó, te dava tucu-o ñí nduu táhú-ó cãháⁿ-ó nàcuáa quèe-xi nchaa tnũhu-áⁿ. ¹¹ Te ìⁿdì díí-ni Espíritú Yã Ndiõxí ducaⁿ chindee ñaha-xi, te ðiu-ni Espíritú-gá dácãhũ ñaha-xi xii-o ndi dííⁿ núú chùⁿ sá cuení mée-xí càda-o.

Nchaa-o ìⁿ-ni cuu-o ndihí Xítóhó Jesucristú

¹² Te nchoo ñãyiu ndècu ñuyú-a titní xichi cùu yiqui cuñú-ó dico ìⁿ-ni cùu-xi, te ðiu-ni ducaⁿ sãtnahá-xi cùu-o vitna ndecu-o ichi Xítóhó Jesucristú chi ìⁿ-ni cùu-o ndihí-gá. ¹³ Te dava-o cùu-o ñãyiu isràél, te dava-o ñà túú cùu-o ñãyiu isràél, te dava-o cùu-o ñãyiu ñá túú tnàhí dàñá quee núú chíúⁿ pãtróoⁿ-xi, te dava-o cùu-o ñãyiu dàñá quée núú chíúⁿ pãtróoⁿ-xi. Te mee Espíritú Yã Ndiõxí ní quide-xi sá ncháá-ó ìⁿ-ná cúú-ó ndècu-o ndihí Xítóhó Jesucristú. Te Yá Ndiõxí ní cachí-gá sá ncháá-ó cùndecu ndihí-o Espíritú-gá.

¹⁴ Te nchòhó xìní-ndó sã tìtní xichi cùu yiqui cuñú-ó te ñá díú ìⁿ-ni xichi cuu-xi. ¹⁵ Te cuèi sáhá-ó ndihí ndaha-o ñá túú ìⁿ-ni cuu-xi dico vá cúú càchí-ó sã sáhá-ó ñà túú cùu-xi yiqui cuñú-ó. ¹⁶ Te cuèi lóho-o ndihí tinuu-o ñá túú ìⁿ-ni cuu-xi dico vá càchí-ó sã lóho-o ñà túú cùu-xi yiqui cuñú-ó. ¹⁷ Te núú nihí ní ndúú yiqui cuñú-ó ní xĩndé mee-ni tinuu-o, te ñá túú ndèe cundeé lóho-o cùndedóho ní cùu te núú ducaⁿ, àdi núú nihí yiqui cuñú-ó ní xĩndé mee-ni lóho-o te ñá túú ndèe cundeé dítní-ó ní cùu te núú ducaⁿ. ¹⁸ Dico mee Yã Ndiõxí ní taxi ndecu-gá ìⁿ ìⁿ xichi yiqui cuñú-ó nàcuáa ní

cachí iní méé-gă. ¹⁹ Te núu ñⁿ-ni sǎ ní xĩndecu ñihí yiqui cùñú-ó, te vá cùndùu-xi nacuáa tàú-xi cunduu ni cùu te núu ducaⁿ. ²⁰ Dico titní xichi cùu yiqui cuñú-ó, te ñⁿ-ni cùu-xi ñihí-xi.

²¹ Te sa nàha-o sá vǎ cúú cǎchí-ó sǎ tĩnuu-o ñǎ túú xìni ñuhu-xi ndaha-o, àdi díquí-ó ñǎ túú xìni ñuhu-xi sáhá-ó. ²² Te nchoo sà naha-o sá dává xichi yiqui cuñú-ó sǎ cǎchí-ó sǎ ñǎ túú cùnuu ío-gá xíní ñuhu-xi. ²³ Te dava xichi yiqui cùñú-ó sǎ ñǎ túú quide cuendá cávihí-ó nchàa xǎⁿ sá quidáhu dóó sácuĩhnu-o, te dava xichi yiqui cùñú-ó ñǎ cúú cùtúu chi dacuítí sǎ quidáhu. ²⁴ Te nchaa xichi yiqui cùñú-ó sǎ cúú cùtúu ñǎ túú xìni ñuhu-xi quidáhu. Te Yá Ndiõxí ní taxi ndecu-gá nchaa xichi yiqui cùñú-ó nàcuáa tàú-xi cunduu. Te ní cachí-gá sá dává-gă xichi yiqui cùñú-ó núú vǎ cúú cùtúu quidáhu. ²⁵ Te ducaⁿ ñǎ quide-gá cuendá sá ñⁿ-ní cùu yiqui cuñú-ó. Te ducaⁿ ndì tnahá ñⁿ ñⁿ xichi yiqui cùñú-ó chĩndee tnahá-xi. Te ducaⁿ sǎtnahá-xi cùu nchoo vitna ndecu-o ichi Xítóhó Jesucrístú chi chĩndee tnahá-o. ²⁶ Te núu ñⁿ xichi yiqui cùñú-ó ná tnàhúhú te ñihí-ó quide úhú-xi, te núu ñⁿ xichi yiqui cùñú-ó ño váha ndècu-xi te ducaⁿ ñihí yiqui cùñú-ó cúú vǎha-xi. Te ducaⁿ sǎtnahá-xi cùu-o vitna ndecu-o ichi Xítóhó Jesucrístú.

²⁷ Te nchoo ndècu ndìhi-o Xítóhó Jesucrístú, te cùu-o datná yiqui cùñú-gá te ñⁿ ñⁿ-o cùu-o datná ñⁿ ñⁿ xichi yiqui cùñú-gá. ²⁸ Te ducaⁿ sǎtnahá-xi cùu-o chi Yá Ndiõxí ní taxi-gá ndí dííⁿ ndì dííⁿ chiuⁿ quide-o sá cúú-xí nchàa ñǎyiu ndècu ichi-gá. Te díhna-gá cue tée caca cuu cáháⁿ tnúhu-gá núú ñǎyiu ní taxi ndecu-gá, te dǎtnùní ní taxi ndecu-gá cue

tée cǎháⁿ tnúhu-gá nàcuáa dàcahu iní ñáhá mèe-gá, te dǎtnùní ní taxi ndecu-gá cue tée dǎnehé ñáhá xii ñáyiú tnúhu-gá núú tàcá-yu, te dǎtnùní ní taxi ndecu tucu-gá cue tée ndàcu quide sá vǎ yǒo tnàhí ndàcu cada. Te ní taxi ndecu tucu-gá cue tée xicáⁿ táhú-ní núú Xǐtohó Jesucrístú cuendá ñáyiú cùhú te ndúha-yu. Te ní taxi ndecu tucu-gá cue tée chindee cue ñáyiú ndècu ichi-gá. Te ní taxi ndecu tucu-gá cue tée yǐndaha ñaha xii ñáyiú ndècu ichi-gá, te ní taxi ndecu tucu-gá cue tée cǎháⁿ tnúhu sá dǎcàhu iní ñáhá Espíritú-gá tnúhu sá ñà túú xìní-güedé.

²⁹ Te ñá ncháá-ó cùu-o cue tée ní táuchíúⁿ Xǐtohó Jesucrístú cǎháⁿ tnúhu-gá núú ñáyiú, te ñá ncháá-ó cùu-o cue tée cǎháⁿ tnúhu sá dǎcàhu iní ñáhá Yǎ Ndiǒxí xii-o. Te ñá ncháá-ó cùu-o cue tée dǎcuaha ñaha xii-yu. Te ñá ncháá-ó cùu-o cue tée quide sá vǎ yǒo tnàhí ndàcu cada.

³⁰ Te ñá ncháá-ó cùu-o cue tée dǐcò-ni cǎcáⁿ táhú núú Xǐtohó Jesucrístú cuendá ñáyiú cùhú te ndúha-yu. Te ñá ncháá-ó cùu-o cue tée cǎháⁿ tnúhu sá dǎcàhu iní ñaha Espíritú Yǎ Ndiǒxí tnúhu sá ñà túú xìní-ó, te ñá ncháá-ó cùu-o cue tée cùtnuní iní-xi cǎháⁿ nàcuáa ndùu tnúhu-áⁿ.

³¹ Te ío nducu ndèe-ndo cada-ndo nacuáa nduu táhú-ndó núú Yǎ Ndiǒxí ncha sá ío-gá cúnùu cada-ndo. Te vitna na dǎnehé ñáhá tùcu-í xii-ndo nàcuáa cada-ndo, dico sá dǎnehé ñáhà-í-a ío-gá cúnùu-xi.

13

Cuu iní-ó tnàha ñáyiú-o

¹ Te núu nchoo xìní-ó cǎháⁿ-ó tnúhu sá ío vii ío váha cuáháⁿ cǎháⁿ ñáyiú ñuyíú-a, àdi xìní-ó cǎháⁿ-ó tnúhu sá ío vii ío váha cuáháⁿ cǎháⁿ cue espíritú xínú cuèchi núú Yǎ Ndiǒxí, te núu xìní-ó cǎháⁿ-ó

nchàa tnúhu-áⁿ te ñá túú cùu iní-ó cuè tnaha ñáyiu-o ña, te ñá túú nàndíhi-xi sá xìní-ó cǎháⁿ-ó tnúhu-áⁿ te cùu-o datná dava caá sá ïo dusaⁿ quìde. ² Te núu cùu-o ñáyiu cǎháⁿ tnúhu sá dácàhu iní ñáhá Yǎ Ndiǒxí, àdi cuu-o ñáyiu cùtnuní iní-xi nàcuáa cuáháⁿ nchaa tnúhu ndùu yuhu ni cuu, àdi cuu-o ñáyiu ío váha cùtnuní iní-xi nchaa nàcuáa quìde Yá Ndiǒxí, àdi cuu-o ñáyiu ío váha sàndáá iní ñáhá xii Yá Ndiǒxí nàcuáa ndacu-o cùu-o ìⁿ yucu xocuiñí-xi núu ndécú-xí, te núu nchaa xǎⁿ xìní-ó càda-o te ñá túú cùu iní-ó cuè tnaha ñáyiu-o ña, te ñá túú vèdana nàndíhi-xi te núu vá cúú ìní-ó tnàha ñáyiu-o cuèi na càda-o nchaa xǎⁿ. ³ Te cuèi nchaa sá ndécú ndíhi-o na dacáhñu-o, te cuèi na cuǎha cuèndá-ó mèe-o cáyú-ó sǎ cúú-xí Yǎ Ndiǒxí, dico ñá túú vèdana chìndee ñaha-xi xii-o sá dúcáⁿ càda-o te núu ñá túú cùu iní-ó cuè tnaha ñáyiu-o.

⁴ Dico núu cùu iní-ó cuè tnaha ñáyiu-o, te cǎhnu iní-ó, te quìde váha-o, te ñá túú cùu-o ñáyiu cuédú iní, te ni ñà túú cǎháⁿ-ó nùu cùu cahnu-o, te ni ñà túú sàni iní-ó càda cahnu-o mee-o, ⁵ te ni ñà túú ñùhu cuehé iní-ó, te ni ñà túú ndùcu-o mee-ni sá cúú-xí mèe-o, te ni ñà túú-gǎ cúdééⁿ-ó cuèndá ìⁿ sá cúú, te ni ñà túú-gǎ sácùhuⁿ iní-ó sǎ quidé ñàha tnaha ñáyiu-o xii-o. ⁶ Te ni ñà túú-gǎ cúdí ìní-ó nchàa sá ñà túú vǎha quìde ñáyiu, chi mee-nǎ cuèndá nchaa sá vǎha cùdí ìní-ó. ⁷ Te nchaa sá yǎha-o sàcǎhnu iní-ó, te sàni váha iní-ó cuèndá nchaa ñáyiu, te sàni iní-ó sǎ díú-ní nchàa sá vǎha cuu xii nchaa tnàha ñáyiu-o ndéé cuéé-gá, te ío quìde cahnu iní-ó cuèi nándi sá yǎha-o, te nchaa xǎⁿ quidé-ó te núu cùu iní-ó cuè tnaha ñáyiu-o.

8 Te ni caa ni quíhíⁿ duha-ni cuu iní-ó cuè tnaaha ñáyi-u. Dico sáá nduu te vá cóó-gã ñáyi-u cáháⁿ tnúhu sá dácàhu iní ñáhá Yă Ndiǒxí, te ni vá cóó-gã ñáyi-u cáháⁿ tnúhu sá dácàhu iní ñáhá Espíritú Yă Ndiǒxí tnúhu sá ñà túú xìní-yu, te ni vá cóó-gã ñáyi-u túha dàtná túha ñáyi-u vitna. 9 Te vitna ñá túú cùtnuní iní-ó nchàa nacuáa sàni iní Yă Ndiǒxí chi sacú-ni cùtnuní iní-ó, te ducaⁿ sàcú-ni càháⁿ-ó nàcuáa ndùu tnúhu-gá, dico càháⁿ-ó tnúhu-gá nàcuáa dàcahu iní ñáhá-gã xii-o. 10 Te na sàá nduu càda Yă Ndiǒxí nchaa nàcuáa tàú-xi cunduu, te dàvá-áⁿ te nchaa sá càhí-gá ñá túú ndècu-xi nacuáa tàú-xi cunduu vá dúcáⁿ-gã cundecu-xi.

11 Te yúhú cútnàhá ní cuu landú-í ní xóo cada-í sá cùu-í landú, ní xóo cáháⁿ-í, ní xóo cani iní-í, te ní xóo tecú tnùn-í dàtná quidé cuè landú xíndecu vitna, dico sátá ní cuu-í ìⁿ tée cùu sacuéhé te ñá túú-gã quidé-í dàtná ní xóo cada-í cútnàhá ní cuu landú-í. 12 Te ducaⁿ sãtnahá-xi cùu-o vitna ndecu-o ichi Xítóhó Jesucrístú, chi ñá túú cùtnuní váha iní-ó nàcuáa cùu cuendá Yă Ndiǒxí, te cùu-o datná ñáyi-u ndèhe ìⁿ núú yùtátá sã ñà túú tũu váha núú-xi, te ducaⁿ sãtnahá-xi cùu-o chi ñá túú cùtnuní váha iní-ó nãsa cùu cuendá-gá, dico sáá nduu quìní núú-ó-gã. Te nchoo sàcú-ni cùtnuní iní-ó nàcuáa ndùu-gá vitna dico na sàá nduu te quìní ndáá-ó nàcuáa càa nacuáa ndùu-gá dàtná xìní ñáhá mèe-gá xii-o. 13 Te ni caa ni quíhíⁿ ducaⁿ-ni quìndáá iní-ó Yă Ndiǒxí, te ducaⁿ-ni cùndecu ndihí-o tnúhu ndee ìní cundecu-o ndihí-gá, te ducaⁿ-ni ìo cuu iní-ó-gã ndihí tnaaha ñáyi-u. Te sá cúú ìní-ó Yă Ndiǒxí ndihí sá cúú ìní-ó tnaaha ñáyi-u-xi ìáⁿ ío-gá cùnùu-xi

dacúúxí dàva-gá.

14

Ñáyiú cǎháⁿ tnúhu sá dácàhu iní ñáhá Espíritú Yă Ndiöxí

¹ Te vá dáñá ndèé-ndó cùu iní-ndó tnàha ñáyiú-ndo, te cuhuⁿ iní-ndó sǎ ndúu táhú-ndó nǔú Yă Ndiöxí títńí núú chiuⁿ cada-ndo nacúáa chindee ñàha Espíritú-gá xii-ndo, te ío cuhuⁿ iní-ndó sǎ ndúú táhú-ndó cǎháⁿ-ndó tnúhu sá dácàhu iní ñáhá Yă Ndiöxí xii-ndo. ² Te cue ñáyiú cǎháⁿ tnúhu sá dácàhu iní ñáhá Espíritú Yă Ndiöxí tnúhu sá ñà túú xíní-yu, te tnúhu cǎháⁿ-yu-áⁿ cúú-xí sǎ cúú-xí Yă Ndiöxí te ñá díú sǎ cúú-xí ñáyiú chí ñá túú tècú tnùní-yu, te mee Espíritú Yă Ndiöxí quídé-xí dùcaⁿ cǎháⁿ-yu tnúhu yìyuhu. ³ Te cue ñáyiú ní nduu táhú nǔú Yă Ndiöxí cǎháⁿ tnúhu sá dácàhu iní ñáhá-gǎ xií-yu, te ñáyiú-áⁿ dácáháⁿ-yu ñáyiú nàcuáa cuita níhí ndéé-gǎ-yu cundecú-yu ichi-gá, te ducaⁿ cuǎñáhá-yu tnúhu ndee iní xií-yu òré ndìhú iní-yu. ⁴ Te ñáyiú cǎháⁿ tnúhu sá dácàhu iní ñáhá Espíritú Yă Ndiöxí xií-yu tnúhu sá ñà túú xíní-yu-áⁿ, ñáyiú-áⁿ mee-nǐ-yu ñíhí ndéé-yu ndècú-yu ichi-gá. Dico ñáyiú cǎháⁿ tnúhu sá dácàhu iní ñáhá-gǎ xií-yu, cǎháⁿ-yu tnúhu-áⁿ nàcuáa níhí ndéé dàva-gá ñáyiú nchicúⁿ nihnu ichi-gá.

⁵ Te yúhú ío cudǐí ìní-í te núu nchaa-ndo cǎháⁿ-ndó tnúhu sá dácàhu iní ñáhá Espíritú Yă Ndiöxí xii-ndo tnúhu sá ñà túú xíní-ndó. Dico ío-gá cudǐí ìní-í te núu nchaa-ndo cǎháⁿ-ndó tnúhu sá dácàhu iní ñáhá-gǎ, chí ío-gá xíní ñùhu-xi sá

càháⁿ-ndó tnũhu-áⁿ dàcúúxí sã càháⁿ-ndó tnũhu sá dácàhu iní ñáhá Espíritú-gá cáháⁿ-ndó tnũhu sá ñã túú xìní-ndó. Dico ìⁿ-ni nũtnahá-xi quìde-ndo te núu nchòhó ñáyiu càháⁿ tnúhu sá dácàhu iní ñáhá Espíritú-gá cáháⁿ-ndó nàcuáa quèe-xi tnúhu-áⁿ. Te ducaⁿ te nchaa ñáyiu ndècu ichi Yá Ndiòxí cuita níhí ndéé-gã-yu quíhíⁿ cundecú-yu ichi-gá. ⁶ Te núu yúhú quexìo-í núú ndécú nchòhó ñáyiu ndècu ndihí-í ichi Xítóhó Jesucristú, te ngúíta-í cáháⁿ-í mee-ni tnũhu sá dácàhu iní ñáhá Espíritú Yá Ndiòxí xii-í tnúhu sá ñã túú xìní-í, te ñã túú nã sá vãha cuu-xi sá cúú-xí-ndó. Dico cuu-xi sá vãha xii-ndo te núu na càháⁿ-í núú-ndó nchaa tnúhu sá dãnèhé ñáhá Yá Ndiòxí xii-í tnúhu sá vátá dácúàha-gá-í, ndihí nchaa tnúhu sá sã xìní-í, ndihí nchaa tnúhu sá dácàhu iní ñáhá-gã xii-í cáháⁿ-í, ndihí nchaa dava-gá tnúhu-gá.

⁷ Te na càda-o cuendá sá nõu ìⁿ tée tiú-dé vïlu àdi cani-dé àrpá te núu ñã túú sàhnú-dé ndihí-xi ìⁿ yaá, te ñã cútnùní iní-ó nã yaá cání-dě àdi ná yaá tiú-dé te núu ducaⁿ na càda-dé. ⁸ Te diu-ni ducaⁿ sãtnahá-xi cùu tucu tée cùu sandadú tiú cútú, chi núu vá tiú váha-dé nàcuáa tàú-xi cunduu òré quíhíⁿ-güedé nàá-güedé, te vá ngũndecu túha dava-gá cue sandadú te núu ducaⁿ na càda-dé vá tiú váha-dé. ⁹ Te ducaⁿ sãtnahá-xi cùu nchohó te núu vá càháⁿ-ndó ìⁿ tnúhu nàcuáa tàú-xi cunduu núú ñáyiu te vá tècú tnùní-yu tnúhu càháⁿ-ndó. ¡Chi àúⁿ nã cuu càháⁿ-ndó te núu ducaⁿ na càda-ndo! ¹⁰ Te ío títní núú tnũhu íó ñuyíú, te ìⁿ ìⁿ núú tnũhu-áⁿ cútnùní iní ñáyiu nàcuáa quèe-xi. ¹¹ Te núu nchoo ñã tècú tnùní-ó ìⁿ tnúhu càháⁿ ìⁿ ñáyiu, te quìde-ó-yu ñáyiu ñúú xícá chi ñã túú càháⁿ-yu

tnúhu cãháⁿ-ó, te ðiu-ni ducaⁿ quide ñahá-yu xii nchoo tùcu. ¹² Te xíãⁿ nõu cãchí tnúhu-í xii nchaa nchòhó ñáyiu ío cuiní nduu táhú nõú Yã Ndiõxí sá Espíritú-gá chindee ñaha-xi xii-ndo cada-ndo ná daha núú chiuⁿ, te ío nducu ndèe-ndo cada-ndo chiuⁿ sá ñi nduu táhú-ndó nãcuáa cuita níhí ndéé-gã ñáyiu ndècu ichi-gá quíhíⁿ.

¹³ Te núu cãháⁿ-ndó tnúhu sá ñà túú xìní-ndó, tnúhu sá dácàhu iní ñáhá Espíritú Yã Ndiõxí xii-ndo, te xìni ñuhu-xi sá cãcãⁿ táhú-ndó nõú Yã Ndiõxí cuendá sá ná chindee ñaha-gá xii-ndo cãháⁿ-ndó nõú ñáyiu núu nása quèe-xi tnúhu-áⁿ.

¹⁴ Chi núu nchoo na cãháⁿ ndihí-o Yã Ndiõxí ndihí tnúhu sá ñà túú xìní-ó, te ñi yùhu ñi iní-ó cãháⁿ ndihí-o-gã ðicó-ni sá ñã tècú tnùní-ó nãcuáa ndùu tnúhu cãháⁿ-ó. ¹⁵ Te xíãⁿ nõu xìni ñuhu-xi cãháⁿ ndihí-o Yã Ndiõxí ñi yùhu ñi iní-ó nãcuáa chindee ñaha Espíritú-gá xii-o te cãháⁿ-ó nãcuáa tecú tnùní-ó, te ðiu-ni ducaⁿ càda-o oré xítá yùhu-o chiñuhu-o Yã Ndiõxí, chi ñi yùhu ñi iní-ó dùcaⁿ cada-o nãcuáa chindee ñaha Espíritú-gá xii-o, te cùtnuní iní-ó nãcuáa cuáhãⁿ nchaa tnúhu cãháⁿ-ó xìta-o.

¹⁶ Chi núu nchoo na ndácãⁿ táhú-ó nõú Yã Ndiõxí ndihí mee-ñi tnúhu sá ñà túú xìní-ó tnúhu sá dácàhu iní ñáhá Espíritú-gá xii-o, te ñáyiu ñà túú ní ndùu táhú cãháⁿ tnúhu cãháⁿ-ó ndèdóho ñahá-yu xii-o, te ñáyiu-áⁿ vã ndácũ-yu cãháⁿ-yu tnúhu cãháⁿ-ó ndácãⁿ táhú-ó ndihí-yu núú Yã Ndiõxí chi ñã túú tècú tnùní-yu tnúhu cãháⁿ-ó. ¹⁷ Te váha-ni quide-o sá dúcãⁿ cãháⁿ-ó ndácãⁿ táhú-ó nõú Yã Ndiõxí, te ðicó-ni sá tnúhu-áⁿ ñà túú chindee-xi ñáyiu nãcuáa cuita níhí ndéé-gã-yu cundecú-yu ichi-gá. ¹⁸ Te yúhú ío ndácãⁿ táhú-í núú Yã Ndiõxí chi cãháⁿ-í tnúhu sá ñà túú xìní-í tnúhu

sá dácàhu iní ñáhá Espíritú-gá xii-í, te càháⁿ-gá-í dácúúxí nchàa nchohó. ¹⁹ Te òré tàcá ñáyiú ndècu ichi Yá Ndiõxí dácuaⁿhá-yu tnúhu-gá, te càháⁿ-í tnúhu-gá núŷ-yu sá sà ní cutnùní iní mée-í nàcuáa ducaⁿ cùtnuní iní-yu nàcuáa ndùu tnúhu càháⁿ-í. Te tnàhá-gá iní-í cáháⁿ-í úhúⁿ-ni tnúhu-áⁿ núŷ-yu dácúúxí sã càháⁿ-í úxí mĩ tnúhu sá ñà túú xìní-í, tnúhu sá dácàhu iní ñáhá Espíritú Yá Ndiõxí xii-í càháⁿ-í.

²⁰ Te nchòhó ñáyiú ndècu ndihí-í ichi Xítohó Jesucristú, vá caní iní-ndó dàtná sání iní cue landú, chí caní iní-ndó dàtná tàú-xi cunduu chí sa sacuéhé-ndó. Dico cuu-ndo dàtná cue landú lihli vá cùndècu-ndo ichi cuehé ichi duha, chí cue landú-áⁿ ñà túú ndècu-güexi ichi-áⁿ. ²¹ Te núú tütú Yá Ndiõxí càháⁿ-xi nàcuáa ní cáháⁿ-gá, te cächí-xi: “Cue tée ñuú xicá càháⁿ ndi dííⁿ núŷ tnúhu quíhíⁿ-güedé cáháⁿ-güedé tnúhu-í núú ñáyiú isràel cada-güedé núu-í, te cuèi ducaⁿ dico vá quèndáá iní-yu tnúhu-í”, duha ní cachí Yá Ndiõxí te ducaⁿ ñi ngúndeé núú tütú-gá. ²² Te tnúhu sá dácàhu iní ñáhá Espíritú Yá Ndiõxí xii-o tnúhu sá ñà túú xìní-ó, xíáⁿ cúú-xí cuèndá sá cùtnùní iní cue ñáyiú ñà túú sàndáá iní tnúhu Yá Ndiõxí sá ñà túú cùu váha iní ñáhá-gã xii-yu. Dico sá cúú-xí cuè ñáyiú sàndáá iní tnúhu-gá ñà túú nã quidé-xí sã cúú-xí-yu. Te tnúhu sá dácàhu iní ñáhá Yá Ndiõxí xii-o, xíáⁿ cúú-xí cuèndá sá cùtnùní iní cue ñáyiú sàndáá iní tnúhu-gá sá ndécú ndihí ñaha-gá xii-yu, dico ñà túú dùcaⁿ sani iní cue ñáyiú ñà túú sàndáá iní tnúhu-gá. ²³ Te núú ní tacá nchaa nchòhó ñáyiú ndècu ichi Yá Ndiõxí, te nchaa-ndo ñi ngüíta-ndo càháⁿ-ndó tnúhu sá dácàhu iní ñáhá Espíritú Yá Ndiõxí xii-ndo

tnũhu sá ñà túú xìní-ndó, te mei òré-áⁿ quexìo cue ñáyiu ñà túú sàndáá iní tnũhu-gá, ndìhì cue ñáyiu vátá quíní dana-gá tnũhu-gá núú ndécú-ndó, te ñáyiu-áⁿ quesàhá-yu sá lùcú-ndó te núu ducaⁿ càháⁿ-ndó tnũhu sá dácàhu iní ñáhá Espíritú-gá xii-ndo òré quexìo-yu. ²⁴ Dico núu nchaa-ndo càháⁿ-ndó tnũhu sá dácàhu iní ñáhá Yã Ndiõxí xii-ndo, te mei òré-áⁿ quexìo cue ñáyiu ducaⁿ ñà túú xìní dana tnũhu-gá-áⁿ, te ñáyiu-áⁿ cutnùnì iní-yu sá ndécú cuèchi-yu núú-gã, te ngüíta-yu cuáha-yu cuèndá sá ñà túú quìde váha-yu ndécú-yu cuèndá sá càháⁿ-ndó tnũhu-gá ndèdóho-yu. ²⁵ Te nchaa sá cuèhé sá dúhá ñǎ quidé-yu sàni iní-yu yìyuhu ndacu iní-yu, te ngüíta-yu náhmá-yu nchaa sá ñà túú vãha ní quidé-yu núú Yã Ndiõxí, te cachí-yu sá ïo càhnu cuu-gá, te cachí tucú-yu sá ndàá ndécú ndìhì-ndo-gá.

Cada-o nàcuáa tàú-xi cunduu

²⁶ Te vitna nchòhó ñáyiu ndècu ndìhì-í ichi Xítóhó Jesucrístú xìni ñuhu-xi duha cada-ndo. Òré tàcá-ndó te dava-ndo càta yuhu-ndo chiñuhu-ndo Yã Ndiõxí, te dava-ndo dàsahú-ndó ñáyiu tnũhu-gá, te dava-ndo càháⁿ-ndó nàcuáa dàquixi túu Yã Ndiõxí iní-ndó, te dava-ndo càháⁿ-ndó tnũhu sá dácàhu iní ñáhá Espíritú Yã Ndiõxí xii-ndo tnũhu sá ñà túú xìní-ndó, te dava-ndo càháⁿ-ndó nàcuáa quèe-xi tnũhu-áⁿ. Te nchaa sá quidé-ndó ná cùu-xi nacuáa chindee-xi ñáyiu nàcuáa cuita níhí ndéé-gã-yu cundecú-yu ichi-gá. ²⁷ Te òré càháⁿ-ndó tnũhu sá dácàhu iní ñáhá Espíritú Yã Ndiõxí xii-ndo tnũhu sá ñà túú xìní-ndó, te

úú-ni-ndo àdi úní-ni tnàhá-ndó cǎháⁿ-ndó tnũhu-áⁿ
 te vá úúⁿní cǎháⁿ-ndó chi ndéé ndihí ìⁿ-ndo
 te dǎtnùní ngúíta ingá-ndó cǎháⁿ-ndó. Te xini
 ñuhu-xi sá íⁿ ñǎyiu cǎháⁿ-yu nàcuáa quèe-xi tnúhu
 cǎháⁿ-ndó-ǎⁿ. ²⁸ Te núu ñá túú ñǎyiu tècú tnùní
 nàcuáa quèe-xi tnúhu cǎháⁿ-ndó-ǎⁿ, te núú méé
 nũú íⁿ-ní-ndó cǎháⁿ-ndó tnũhu-áⁿ cǎháⁿ ndihí-ndo
 Yǎ Ndiòxí te vá cǎháⁿ-ndó nũú ñǎyiu. ²⁹ Te òré
 cǎháⁿ-ndó tnũhu sá dácàhu iní ñáhá Yǎ Ndiòxí
 xii-ndo te úú-ni-ndo àdi úní-ni tucu-ndo cǎháⁿ, te
 dava-gá-ndó cùndedóho-ndo tnũhu-áⁿ te cǎháⁿ-ndó
 nũu váha-ni cǎháⁿ-güedé àdi ñá túú vǎha-ni. ³⁰ Te
 núu ìⁿ-ndo nǐ dácáhú ìní ñáhá Yǎ Ndiòxí xii-ndo
 ìⁿ tnúhu cǎháⁿ-ndó, te núu ìⁿ-ndo sà cǎháⁿ-ndó
 te ngüíñí-ndó te quíhu tucu ingá-ndó cǎháⁿ-ndó
 nàcuáa ní dácáhú ìní ñáhá Yǎ Ndiòxí xii-ndo. ³¹ Te
 nchaa nchòhó ñǎyiu ní nduu táhú cǎháⁿ tnúhu sá
 dácàhu iní ñáhá Yǎ Ndiòxí, te vá úúⁿ-ní cǎháⁿ-ndó
 chi díhna-gá ìⁿ-ndo cǎháⁿ te dǎtnùní cǎháⁿ tucu
 ingá-ndó. Te ducaⁿ càda-ndo cuendá nchaa-ndo
 tècú tnùní-ndó nàcuáa ndùu tnúhu cǎháⁿ ìⁿ ìⁿ-ndo,
 te ducaⁿ te cudí-gǎ iní-ndó cànchicúⁿ nihnu-ndo
 ìchi-gá. ³² Te nchaa ñáyiu cǎháⁿ tnúhu Yá Ndiòxí
 sa nàha-ná méè-yu nàcuáa quidé-yu cǎháⁿ-yu
 tnúhu-gá nàcuáa ñá túú quide cutexínu-yu. ³³ Te
 Yá Ndiòxí cúú-gǎ Yaá quidé ïo váha cùu ìⁿnuu-ndo
 ndecu-ndo, te ñá túú dàticá nuu ñaha-gǎ xii-ndo.

Te na cǎchí tnúhu-í xii-ndo nàcuáa cǎháⁿ-í nchaa
 núú tàcá cue ñáyiu ndècu ndihí-o ichi Xítóhó Je-
 sucristú. ³⁴ Te yúhú cǎchí-í sá vǎ cúú cǎháⁿ cue
 ñáyiu díhí òré tàcá-ndó dàcuaha-ndo tnúhu-gá, chi
 ñá túú dùcaⁿ cuiní-gá cadá-yu, te quíndáá-ni iní-yu
 cadá-yu nàcuáa tàú-xi cunduu. ³⁵ Te núu ìⁿ sá

cuiní-yu nducu tnũhu-yu te ndée òré nasáá-yu vehé-yu te nducu tnũhu-yu núú yí-yu, chi ñá túú ndùu váha-xi sá cãháⁿ-yu núú tàcá nchaa ñáyiu dàcuáha ndihí-yu tnúhu-gá.

³⁶ Te chí dándàcu iní sá ñà díú nchòhó cúú-ndó ñáyiu ní ngúndecu ndihí tnúhu Yá Ndiõxí díhna nuu nàcuáa datècú tnúhu-ndo dàva-gá ñáyiu, te ni ñà díú mèe-ni nchohó sa ní ngúndecu ndihí-ndo tnũhu Yá Ndiõxí vitna, núu xiãⁿ vá cãchí-ndó sã ìo cùnuu-ndo. ³⁷ Te núu dava nchòhó sání iní-ndó sã cãháⁿ-ndó nàcuáa dàcãhu iní ñáhá Yá Ndiõxí xii-ndo àdi sani iní-ndó sã quidé-ndó nàcuáa chindee ñaha Espíritú-gá xii-ndo, te cuáha váha-ndo cuendá sá ncháá tnũhu cãháⁿ-í-a cùu-xi tnúhu sá nĩ cachí tnúhu mee Xítóhó Jesucristú cada-o. ³⁸ Te ndèda-ni cãa ñáyiu ndècu ndihí-ndo te núu ñá túú sàndáá iní-yu tnúhu cãháⁿ-í, te vá cáda cuendá-ndó tnũhu cãháⁿ-yu.

³⁹ Te vitna nchòhó ñáyiu ndècu ndihí-í ichi Xítóhó Jesucristú, ío cani iní-ndó cãháⁿ-ndó tnũhu sá dácãhu iní ñáhá Yá Ndiõxí núú ñáyiu, te dañ-ndo na cãháⁿ cue ñáyiu ní nduu táhú nũú Yá Ndiõxí sá cãháⁿ-yu tnúhu sá dácãhu iní ñáhá Espíritú-gá xii-yu tnúhu sá ñà túú xini-yu. ⁴⁰ Te cada-ndo nchãa nacuáa tàú-xi cunduu nàcuáa ñá túú nã cuu cundecu-ndo.

15

Ní ndoto Xítóhó Jesucristú

¹ Te vitna nchòhó ñáyiu ndècu ndihí-í ichi Xítóhó Jesucristú cuiní-í sá dándàcu iní-ndó nàcuáa ní dánèhé ñáhà-í xii-ndo tnũhu sá cãháⁿ nàcuáa naníhí tàhú-ó, chi diu tnúhu-áⁿ nĩ sàndáá iní-ndó te

nchìcúⁿ nihnu-ndo. ² Te sá xíí tnũhu-áⁿ níhnú-ndó ìchi cuáháⁿ-ndó núú ndúú tǎhú-ndó cùndecu-ndo ndihì Yá Ndiõxí ní caa ní quíhíⁿ, te ducaⁿ ndúu tǎhú-ndó núú cùndècu-ndo ní caa ní quíhíⁿ ndihì Yá Ndiõxí te núu nchìcúⁿ nihnu-ndo nàcuáa ní dánèhé ñàhà-í xii-ndo, te núu ñá túú nchìcúⁿ nihnu-ndo te ñá túú ní sàndáá iní-ndó nàcuáa tàù-xi cunduu.

³ Te yúhú sa ní cachí tnúhu-í xii-ndo ìⁿ tnúhu sá ïo cùnuu ní níhì-í, chi ní cachí tnúhu-í xii-ndo sǎ Xítohó Jesucristú ní xíhí-gá cuèndá nchaa yíca cuèchi-o, te ducaⁿ ní cuu chi ducaⁿ càháⁿ-xi núú tùtú Yǎ Ndiõxí sá dúcáⁿ yǎha-gá. ⁴ Te ní chindúxi ñaha-güedě xii-gá te nduu úní ní dándótó ñaha Yá Ndiõxí xii-gá, te ducaⁿ ní cuu chi ducaⁿ càháⁿ-xi núú tùtú Yǎ Ndiõxí. ⁵ Te sátá ní ndoto-gá te ní quee túu-gá núú tǎ Pèlú, te dàtnùní ní quee túu-gá núú dàva-gá cue téé ní táúchíúⁿ-gǎ cáháⁿ tnúhu-gá. ⁶ Te sátá dúcáⁿ te dàtnùní ní quee túu-gá núú úhúⁿ cièndú cue ñáyíu ndècu ichi-gá, te vǎi-yu xíndecu-ní-yu vitna chi sacú-ni-yu ní xíhí. ⁷ Te dàtnùní ní quee túu-gá núú tǎ Jàcobó, te sátá dúcáⁿ te dàtnùní ní quee túu-gá núú nchaa cue téé ní táúchíúⁿ-gǎ cáháⁿ tnúhu-gá.

⁸ Te ndéé núú ní ndihì-ná te ní quee túu-gá núú mèe-í, te òré ní quee túu-gá núú-í te cùu-í dàtná ìⁿ déhe yiquíⁿ vǎtá sàá-gá nduu càcu chi cùu-í ìⁿ téé ñá túú sàni váha iní-xi cuèndá-gá ní cùu. ⁹ Te yúhú ñá túú cùnuu-í dàtná cùnùu cue téé ní táúchíúⁿ Xítohó Jesucristú cáháⁿ tnúhu-gá. Te cùu-í ìⁿ téé ní táúchíúⁿ-gǎ càháⁿ tnúhu-gá, cuèi ñá túú tàù-í sá càháⁿ-í tnúhu-gá, chi ní xóo cuu úhú iní-í cue ñáyíu ndècu ichi Yá Ndiõxí. ¹⁰ Dico Yá Ndiõxí ïo váha iní-gá chi ní quide ñaha-gǎ xii-í ìⁿ téé váha, chi ñá

túú-gă quídè-í dàtná ní xóo cada-í. Te ío cùndahú iní ñáhá-gă chíndèe ñaha-gá xii-í dico ñá túú àúⁿ nă cuu chindee ñaha-gá, chi ío-gá vâi chiuⁿ-gá ní cuu sa ta quídè-í cuáháⁿ dàcúúxí dâva-gá cue tée ní táúchíúⁿ-gă cáháⁿ tnúhu-gá te ñá díú mèe-í ducaⁿ quídè-í chi mee Yă Ndiǒxí ío cùndahú iní ñáhá-gă chíndèe ñaha-gá xii-í quídè-í chiúⁿ-gá. ¹¹ Te ñá túú nă cada-xi cuèi dava-gá-güedé sa ní cuu vâi-gá chiúⁿ-gá quídé-güedě àdi yúhú, chi ìⁿ-ni tnúhu càháⁿ-ndí te tnúhu-áⁿ cúú tnúhu ní sándáá iní-ndó.

Cue ñáyiú ní xíhí ndotó-yu

¹² Te nchúhú cue tée càháⁿ tnúhu Xítóhó Jesucristú càháⁿ-ndí sá nǐ xíhí-gá te ní ndoto-gá, ¿te ná cuendá dava nchòhó càchí-ndó sǎ vǎ ndótó cuè ñáyiú ní xíhí? ¹³ Te núu ducaⁿ sàni iní-ndó sǎ vǎ ndótó cuè ñáyiú ní xíhí te ni Xítóhó Jesucristú ñá túú ní ndòto-gá te núu ducaⁿ. ¹⁴ Te núu dicó Xítóhó Jesucristú ñá túú ní ndòto-gá ñá, te nchaa tnúhu sá dánèhé ñáhá-ndí xii-ndo ñà túú nàndíhi-xi te núu ducaⁿ, te àúⁿ nă cuu sándáá iní-ndó-gă te núu ducaⁿ. ¹⁵ Te núu dicó cúú-xí ìⁿ sá ndáá tnúhu sàni iní dava-ndo ña, te dàcuandehnde-ndí sá càháⁿ-ndí tnúhu Yă Ndiǒxí núú-ndó te núu ducaⁿ, te ñá túú càháⁿ ndáá-ndí núú-ndó sǎ Yă Ndiǒxí ní dándótó-gă Xítóhó Jesucristú, te núu ndáá nàcuáa sàni iní dava-ndo sǎ vǎ ndótó cuè ñáyiú ní xíhí, dico ñá ndáá nàcuáa sàni iní-ndó. ¹⁶ Te núu vǎ ndótó cuè ñáyiú ní xíhí te ni Xítóhó Jesucristú ñá túú ní ndòto-gá. ¹⁷ Te núu Xítóhó Jesucristú ñá túú ní ndòto-gá ñá, te àúⁿ nă cuu sándáá iní-ndó-gă te núu ducaⁿ, te ndècu-ni cuéchi-ndo núú Yă Ndiǒxí te núu ducaⁿ. ¹⁸ Te núu ndáá nàcuáa sàni iní-ndó

ñá te cue ñáyiú ní sándáá iní ñáhá xì Xítóhó Jesucristú ñáyiú ní xíhí ní xíta nihnú-yu te núu ducaⁿ.
 19 Te núu nchoo ndècu ndihí-o tnúhu ndee iní núu Xítóhó Jesucristú cuendá-ní sá cùndècu-o ñuyíú-a ña, te cùu-o ñáyiú ío-gá duuⁿ duuⁿ ndàhú sá cúú-xí dàva-gá ñáyiú te núu ducaⁿ.

20 Dico ndáá sá Xítóhó Jesucristú ní xíhí-gá te ní ndoto-gá ñúu xiáⁿ cútnùní iní dava-o sã ndótó cuè ñáyiú ní xíhí ñáyiú ní sándáá iní tnúhu-gá.
 21 Te sá cuèchi ñⁿdìi-ní téé ní xíndecu ñuyíú-a xiáⁿ xihí ñáyiú, te sá cuendá ñⁿdìi-ní tucu ingá téé te ndoto cue ñáyiú ní xíhí. 22 Te nchaa ñáyiú xihí-yu sá cuèchi ñⁿ téé, te téé-áⁿ cúú-dě ndíi Àdán téé díhna nuu ñⁿ cuu ñaní tnáhá cuè ñáyiú ñuyíú. Te ñⁿyu-ní ducaⁿ sã cuendá ñⁿdìi-ní téé te ndoto cue ñáyiú ní xíhí, te téé-áⁿ cúú-dě Xítóhó Jesucristú chí nchaa ñáyiú ndècu ndihí-gá ndotó-yu. 23 Te díhna-gá Xítóhó Jesucristú ní ndoto-gá xiáⁿ cútnùní iní dava-o sã ndùu na quixi tucu-gá ñuyíú-a te dàvá-áⁿ ndoto nchaa ñáyiú ní xíhí ñáyiú ní sándáá iní tnúhu-gá. 24 Te dàtnùní ducaⁿ te sáá nduu nàa nchaa sá ío ñuyíú, te Xítóhó Jesucristú danàa-gá nchaa ndi túhú sá cùnùu ío ñuyíú-a, chí danàa-gá nchaa ñáyiú ío cùnùu, ndihí yucu ñávàha, ndihí nchaa espíritú xínú cuèchi núu-xi. Te ducaⁿ te cúñaha-gã xii Tátá-ó Dütú Ndiõxí taxi tnùní-gá.
 25 Chí Xítóhó Jesucristú dacuítí tàxi tnùní-gá ndéé ná sáá nduu dànaa-gá nchaa sá cúú ùhú iní ñáhá xì-gá. 26 Te ndéé núu ñⁿ ndihí-ná te danàa-gá sá quidé xihí ñáyiú. 27 Te ducaⁿ chí càháⁿ-xi núu tùtú Yã Ndiõxí sá méé-gã ní nachihí-gá nchaa sá ío ndaha Xítóhó Jesucristú cuendá sá méé Xítóhó

Jesucristú taxi tnùní-gá, te vá yõo ìⁿ tàxi tnuní ñáhá xii Yá Ndiõxí, chi mee Yă Ndiõxí cúú-gă Yaá ní nachihi-gá nchaa sá ió ndaha Xítóhó Jesucristú. ²⁸ Te díhna-gá ní xáhaⁿ Yă Ndiõxí xii Xítóhó Jesucristú Yaá cúú Dêhe-gá sá quíndàha-gá nchaa sá ió, te òré ná quíndaha Xítóhó Jesucristú nchaa sá ió, te cúñaha-gă xii Yá Ndiõxí taxi tnùní ñáhá-gă xii-gá, te ducaⁿ te mee-nă Yă Ndiõxí taxi tnùní-gá nchaandi túhú sá ió.

²⁹ Te núu ñá túú ndăá càháⁿ-í, ¿te ná cuendá dava ñáyiú sànduté-yu cuendá ñáyiú ní xíhí nũu ñá túú ndăá sá ndótó ñáyiú ní xíhí?

³⁰ Te nchúhú ducaⁿ-ni sàni iní ñáyiú cahni ñáhá-yu xii-ndí, te núu vá ndótó ñáyiú ní xíhí te àúⁿ nă cuu ducaⁿ quide cahnu iní-ndí ducaⁿ cuíní-yu cahni ñáhá-yu xii-ndí te núu ducaⁿ. ³¹ Te nchòhó ñáyiú ndècu ndìhi-í ichi Xítóhó Jesucristú ío váha sàni iní-í cuendá-ndó, chi ndècu-o ichi-gá. Te na càchí tnúhu ndáá-í xii-ndo să ìⁿ nduu ìⁿ nduu ndeé iní ñáhá ñáyiú cahni ñáhá-yu xii-í. ³² Te núu dícó ndáá sá vă ndótó ñáyiú ní xíhí dàtná càchí dava ñáyiú, te àúⁿ nă cuu ní xíndecu-í ñúú Éfesú ní cuu úhú iní ñáhá ñáyiú xii-í te núu ducaⁿ, chi ñáyiú-áⁿ nǐ quidé-yu dàtná quidé ìⁿ quítì dééⁿ să cúú-xì-í. Te núu ndáá sá vă ndótó ñáyiú ní xíhí ñá, te váha-gá nũu cachí-ó dàtná càchí ñáyiú: “Vitna na còho-o te na càxi-o chi tneé ìdá cuú-ó”, duha càchí-yu.

³³ Te vá dáñá-ndó mèe-ndo dandahú ñáhá ñáyiú ndècu ichi cuehé ichi duha xii-ndo, te ngũíta-ndo càni iní-ndó dàtná sání ìní-yu. Chi quèe ndáá-xi nàcuáa càháⁿ tucu dava-gá ñáyiú, chi càchí-yu sá nũu ñáyiú quide váha na ñìhí tnáhă-yu ndìhi ñáyiú

ndècu ichi cuehé ichi duha, te ngüïta ñáyiú quède váha-án cadá-yu tnàhá-yu nchaa sá cuèhé sá dúhá dàtná quidé ñáyiú-án. ³⁴ Te ío váha cuáha-ndo cuendá nàcuáa cundecu-ndo, te vá cadá-gã-ndó dàtná quidé cuè ñáyiú ndècu ichi cuehé ichi duha. Te dava-ndo quède-ndo datná quidé cuè ñáyiú ndècu ichi cuehé ichi duha chi ñá túú sàndáá iní-ndó Yá Ndiöxí. Te duha càháⁿ-í cuendá sá cúcàháⁿ núú-ndó cuendá nchaa sá ñà túú vâha quède-ndo.

Nàcuáa ndoto ñáyiú ní xíhí

³⁵ Te cudana dava-ndo ndècu tnúhu-ndo núu nása ndoto ñáyiú ní xíhí, te nása cunduu yiqui cùñú-yu òré ndotó-yu. ³⁶ Te nchòhó ñáyiú ducaⁿ càháⁿ cúú-ndó ñáyiú ñá túú tnàhí cùtnuní iní-xi, te duha na càháⁿ-í nàcuáa tecú tnùní-ndó. Te núu ìⁿ tatá ná chíhí-ó te tèhyú méé-xí te xínu déhe-xi. ³⁷ Dico ñá díú sã sà ní xínu ta sàhnu cuáháⁿ ní cùxi-o, te diu-ni ducaⁿ quède-o cuéi triú ndìhí nchaa dava-gá tatá xítú-ó. ³⁸ Te Yá Ndiöxí quidé-gã sácũnduu tatá xínu-án dàtná cuení méé-gã cunduu. Te ndèda-ni càa tatá te diu-ni-gá quidé-gã sácũnduu-xi nàcuáa tàú-xi cunduu. ³⁹ Te ndi dííⁿ ndáa nchaa yiqui cùñú, chi tucu càa yiqui cuñú nchoo cuè ñáyiú, te tucu càa yiqui cuñú nchaa quiti xica núú ñúhú, te tucu càa yiqui cuñú nchaa quiti ndàva, te tucu càa yiqui cuñú nchaa chácá. ⁴⁰ Te ducaⁿ ñà túú ìⁿ-ni caa nchaa yiqui cuñú sá ío andiú ndìhí nchaa yiqui cuñú ñáyiú ío ñuyíú-a, te ducaⁿ ñà túú ìⁿ-ni ndáa vii nchaa sá ío andiú ndìhí ñuyíú-a. ⁴¹ Te ducaⁿ cùu tucu-xi nchícanhii chi tucu dáyehé-xi, te tucu dáyehé yóó, te tucu dáyehé

nchaa chódíní, te ducaⁿ ñà túú ìⁿ-ni dayehé nchaa chódíní. ⁴² Te ducaⁿ sãtnahá-xi cùu ñáyíu ní xihí te ndoto, chi tucu càa yìquì cuñú-yu sá nguĩndũxi te tucu cunduu yìquì cùñú-yu òré ndotó-yu, te yìquì cùñú sá ndótó ndìhí-yu-áⁿ vã ndìhí nihnu-gá-xi. ⁴³ Te yìquì cùñú ñáyíu xihí ñá túú nàndìhí-xi, dico yìquì cùñú sá ndótó ndìhí-yu te ío váha cunduu. Te nchaa yìquì cùñú ñáyíu xihí ñá túú tnàhí-gá ndee-xi, dico yìquì cùñú ndoto ndìhí-yu xíãⁿ ío cunduu ndee-xi. ⁴⁴ Te yìquì cùñú nchaa ñáyíu xihí cúú-xí cuendá ñuyíú-a, dico yìquì cùñú sá ndótó ndìhí-yu xíãⁿ cundecu-ná-xi cuendá Espíritú Yã Ndiõxí. Te dàtná ío yìquì cùñú sá cúú-xí cuendá ñuyíú-a, te ducaⁿ ío yìquì cùñú sá cúú-xí cuendá mee-nã Espíritú Yã Ndiõxí.

⁴⁵ Te núú tùtú Yã Ndiõxí càchí-xi: “Ndíi Àdán ndíi ní xíndecu ndéé díhna ní chihí Yá Ndiõxí iní ndíi”, duha càchí-xi núú tùtú-gá. Te ìngá tucu téé cùu-dé dàtná ndíi Àdán te téé-áⁿ cúú-dě Xítóhó Jesucrístú, te Yaá-áⁿ quidé-gã sá mèe-ná Espíritú Yã Ndiõxí quidé-xí ndècu-o ichi-gá vitna. ⁴⁶ Te díhna-gá yìquì cùñú cuendá ñuyíú-a ní ngúndecu, te dàtnùní ngúndecu yìquì cùñú cundecu ndìhí mee-nã Espíritú Yã Ndiõxí. ⁴⁷ Te téé díhna nuu ñí xíndecu ñuyíú-a chi ñuhu ní cadúha ñaha Yã Ndiõxí xii-dé, te téé-áⁿ cúú-dě ndíi Àdán, te ìngá tucu téé ní cuuⁿ-dé andíu te téé-áⁿ cúú-dě Xítóhó Jesucrístú. ⁴⁸ Te nchaa ñáyíu càa yìquì cuñú-yu dàtná cáá yìquì cuñú té Àdán téé ducaⁿ ñí cuáha ñuhu-áⁿ, te nchaa ñáyíu ní nduu táhú cundecu ndìhí téé ducaⁿ vëxi cuuⁿ andíu-áⁿ, ñáyíu-áⁿ nduu yìquì cùñú-yu dàtná

cáá yìquì cuñú ní nduu táhú-dě ndécú ndìhì-dé vitna, te téé-áⁿ cúú-dě Xítóhó Jesucrìstú. ⁴⁹ Te nchaa ñáyíu ñuyíú-a càá-yu dàtná-ni càa datná-ni ndùu téé ducaⁿ ñí cuáha ñuhu-áⁿ. Te nchaa nchoo ñáyíu ní nduu táhú cundecu ndìhì téé ducaⁿ vèxi cuuⁿ andíu-áⁿ nduu-o dàtná-ni càa datná-ni ndùu téé-áⁿ tucu.

⁵⁰ Te nchòhó ñáyíu ndècu ndìhì-í ichi Xítóhó Jesucrìstú càchí tnúhu-í xii-ndo sã ncháá nàcuáa càa yìquì cuñú ñáyíu xíndecu vitna vá sàá-xi cundecu-xi núú ndécú Yă Ndiöxí táxí tnùnì-gá, chi ñuyíú-a ndìhì nihnu-xi. Dico sá tàú-xi sáá núú ndécú-gă táxí tnùnì-gá xìni ñuhu-xi cuu-xi sá cúdìi cundecu. ⁵¹ Te na càchí tnúhu-í xii-ndo ñⁿ tnúhu sá yíyùhu ni cuu: Dava-o cùú-ó te dava-o cùndecu-ni-o, dico nchaa-o nàdáma yìquì cuñú-ó. ⁵² Te uuⁿni ducaⁿ nàdáma yìquì cuñú-ó òré cáháⁿ ñⁿ cútú, te cútú-ăⁿ cãháⁿ-xi òré sa ta cùyatni naa ñuyíú. Te òré cáháⁿ cútú-ăⁿ te ndoto nchaa ñáyíu ní xíhì ñáyíu ní xíndecu ichi Xítóhó Jesucrìstú, te ducaⁿ te vá ñⁿ ndùu ñⁿ quíú-gă cuú-yu. Te nchaa ñáyíu ndècu vívú te nàdáma yìquì cuñú-yu tnàhá-yu. ⁵³ Te nchaa yìquì cuñú ndécú ndìhì nchaa ñáyíu ndècu ñuyíú-a vitna ñá túú cùdíi-xi chi xihí-xi, dico yìquì cuñú nduu táhú nchoo ñáyíu ndècu ichi Xítóhó Jesucrìstú chi cudíi-xi ni caa ni quíhìⁿ chi vá cùú-gá-xi. ⁵⁴ Te òré ná ndùu táhú-ó yìquì cuñú sá dúcáⁿ cùdíi ni caa ni quíhìⁿ-áⁿ, te vá cùndècu ndìhì-gá-ó yìquì cuñú sá ñà túú cùdíi. Te dàvá-áⁿ te quee ndáá-xi nàcuáa càháⁿ-xi núú tütú Yă Ndiöxí núú càchí-xi: “Vitna ñá túú-gă xihí ñáyíu chi mee-nă Yă Ndiöxí cúnùu-gá táxí tnùnì

ñáhá-gă xií-yu. ⁵⁵ Te ñá túú tnàhí-gá ná ndoho ñáyiu sá cuendá tnúhu xihí, chi vá cóó-gă tnúhu xihí”, duha càchí-xi núú tütú Yă Ndiöxí. ⁵⁶ Te cue ñáyiu ndècu ndihí-yu tnúhu sá sánú ìchi ñaha xií-yu nàcuáa cadá-yu cundecú-yu dico uuⁿ-gá quidě-yu nchaa sá cuèhé sá dúhá. Te sá cuendá nchaa sá cuèhé sá dúhá quidé-yu-áⁿ, te xíáⁿ ní ngúndecu tnúhu xihí dándóho ñaha-xi xií-yu. ⁵⁷ Dico táxăhu xii Yá Ndiöxí chi ní taxi-gá tnúhu ndee ìní ndécú ndìhi-o sá sàá nduu te vá quìní-gá-ó tnúhu xihí, te ducaⁿ chi ndècu ndìhi-o Xítóhó Jesucrìstú.

⁵⁸ Te xíáⁿ nùu càháⁿ-í dóho nchòhó cue ñáyiu ndècu ndìhi-í ìchi Xítóhó Jesucrìstú chi ío cùu ìní ñáhà-í xii-ndo, te càháⁿ-í dóho-ndo sã cáncícúⁿ nihnu-ni-ndo ìchi Xítóhó Jesucrìstú cuèi nándi na càda ñaha ñáyiu xii-ndo sã cuendá-gá, te ío nducu ndèe-ni-ndo cada-ndo chiuⁿ-gá, chi sa nàha-ndo sá ncháá chiuⁿ quide-o cuendá-gá ñá túú àúⁿ nă cuu quide-o.

16

Nàcuáa sàcáⁿ tnáhá ñáyiu díhúⁿ

¹ Te na càchí tnúhu-í xii-ndo cuendá díhúⁿ sã sàcáⁿ tnáhá-ndó sã cúú-xí ñáyiu ñuú Jerusàlén, chi ñiu-ni duha ní dánèhé-í cue ñáyiu xĩndecu ìchi Xítóhó Jesucrìstú ndécú ìⁿ ìⁿ xichi distritú Gàlaciá.

² Te duha cada-ndo ndì tnahá nduu ndumìngú, te ìⁿ ìⁿ-ndo dàquee dìⁿ-ndo sacú díhúⁿ nàcuáa chĩndee ñaha Yá Ndiöxí xii-ndo nihí-ndó cuendá òré quexìo-í te sa cundecu túha díhúⁿ-ăⁿ. ³ Te òré quexìo-í te mee-ndo cãxi-ndö-yu núu ndēdacàa-yu sàni ìní-ndó càda ndáá canehe díhúⁿ-ăⁿ quĩhíⁿ

ndaha ñáyiú xĩndecu ichi Xítóhó Jesucrístú ndécú ñúú Jerusàlén. Te cadúha-í ñⁿ úú tutú canehé-yu quíhⁿ cuendá cutnùní iní ñáyiú ñúú Jerusàlén nàcuáa ndùu chiuⁿ cuáháⁿ-yu. ⁴ Te núu xìni ñuhu-xi sá quíhⁿ-í te candeca-í-yu quíhⁿ.

Té Păblú sání iní-dé quíngoto-dé cue ñáyiú ndècu ichi Xítóhó Jesucrístú

⁵ Te yúhú sání iní-í yáha-í ñⁿ úú ñúú cáa dìstrítú Macèdoniá, te dătnùní ducaⁿ te sáa-í núu ndécú-ndó. ⁶ Te òré quexìo-í te cudana cundecu ndihí ñaha-ĩ xii-ndo vâi nduu, àdi cudana te cundecu ndihí ñaha-ĩ xii-ndo ndèé yáha nchaa yóó quidé ṽxiⁿ-xi. Te sátá dúcáⁿ te cada ndee iní-ndó chĩndee ñaha-ndo xii-í òré nucúhuⁿ ichi-í te núu ndèé ichi na quíhⁿ-í. ⁷ Te duha càháⁿ-í chi núu Yá Ndiõxí ná càchí-gá te cundecu ndihí ñaha tnàa-í xii-ndo òré quexìo-í te ñá díú dicó-ni ichi yáha-í. ⁸ Te cundecu-ni-í ñúú Éfesú-a ndèé tnahá vico Pentecòstés. ⁹ Te ducaⁿ chi iha ío tèdóho ñáyiú tnúhu Xítóhó Jesucrístú sá càháⁿ-í núú-yu. Núu xíãⁿ ío váha quèe cuendá cada-í chiúⁿ-gá cuèi ío vâi ñáyiú ñá túú tnàhá iní-yu sá càháⁿ-í tnúhu-gá.

¹⁰ Te núu na quixi coto ñaha té Timùteú xii-ndo, te ío váha cuu iní-ndó càháⁿ ndihí-ndo-dě cuendá ducaⁿ ña túú nã caní iní-dé cundecu ndihí ñaha-dě xii-ndo, chi tnàhá-dé cúú-dě tée quide chiuⁿ Xítóhó Jesucrístú dătná quidè-í. ¹¹ Te cuiní-í sá nì ñⁿ-ndo vá caní cuéhé iní-ndó cuendá-dé, te chĩndee-ndo-dě nàcuáa cuu váha iní-dé òré quixi-dé quixi coto ñaha-dě xii-í, chi yúhú ndihí dava-gá ñáyiú ndècu ichi Xítóhó Jesucrístú ndétú-ndí-dé quexìo-dé.

12 Te ío ní cáháⁿ ndàhú-í núú tẽ Àpolós téé ndècu ndìhi-o ichi Xítóhó Jesucrìstú cuendá quixi-dé ndìhi dava-gá cue téé ndècu ndìhi-o ichi-gá quixi coto ñaha-güedè xii-ndo dico ñá túú ní cuíní-dé quixi-dé vitna, dico quixi-dé ndéé cuèé-gá.

Tnúhu ndéé núú ñí ndìhi-ná

13 Te ío quíhi iní-ndó cùndecu-ndo ichi Xítóhó Jesucrìstú, te vá dáñá ndèé-ndó quìndáá iní-ndó-gã, te ío yíi cùnduu iní-ndó cùndecu-ndo ichi-gá, te ío nducu ndèe-ndo canchicúⁿ nihnu-ndo ìchi-gá.

14 Te ío váha cuu iní tnáhá-ndó, te ducaⁿ ío váha cada tnàha-ndo te núu nándi cùu sá vãha sàni iní-ndó cada-ndo.

15 Te nchòhó ñáyiu ndècu ndìhi-í ichi Xítóhó Jesucrìstú sa nàha-ndo sá ðìhnanuu cuè ñáyiu cùu ndi mee té Èstéfanás ndécú ðìstritú Acãyá ní sándáá iní-yu tnúhu Xítóhó Jesucrìstú. Te vitna ñá túú dàña ndeé-yu quidé-yu sá vãha sá cúú-xí dàva-gá ñáyiu sándáá iní tnúhu-gá. 16 Te cáháⁿ ndàhú-í

núú-ndó sã quìndáá iní-ndó nchàa ñáyiu ducaⁿ xíquide, ndìhi nchaa dava-gá ñáyiu ío ndùcu ndee quide chiuⁿ ndìhi-ndo cuendá Xítóhó Jesucrìstú.

17 Te ío cùdíí iní-í sá ñí quexìo té Èstéfanás, ndìhi té Fortunátú, ndìhi té Acàicú, chi cue téé-áⁿ ñí quide-güedé núú-ndó ñí quide-güedé nchaa sá ñà túú ndàcu-ndo cada-ndo cuendá-í ní cùu. 18 Te ío tàxi-güedé tnúhu ndee iní xii-í, te ðiu-ni ducaⁿ

tàxi-güedé tnúhu ndee iní xii nchòhó tucu, te núu xíãⁿ xíní ñùhu-xi sá cánèhe-ndo sá yíñùhu núu nchàa cue téé duha xíquide vãha.

19 Te nchaa ñáyiu xíndecu ichi Xítóhó Jesucrìstú ndécú ðìstritú Àsiá quide ndee iní ñáhã-yu xii-ndo,

te ío cada ndee ìní-ndó càchí té Àquilú ndíhi ñadìhí-dé tá Priscilá, te ducaⁿ quìde ndee iní ñáhá tùcu nchaa ñáyiù tàcá dácuàha tnúhu Yá Ndiòxí vehé-yu xii nchaa nchòhó ñáyiù ndècu ichi-gá.

²⁰ Te cada ndee ìní tucu-ndo càchí cue dava-gá ñáyiù ndècu ndíhi-o ichi Xítóhó Jesucrìstú. Te ní yùhu ní ìní-ndó càda ndee iní tnáhá-ndó ìíⁿ ìíⁿ-ndo.

²¹ Te vitna ndaha mee yùhú té Păblú tée-í tnúhu-a quìde ndee iní ñáhà-í xii-ndo.

²² Te ñáyiù ñá túú cùu váha iní-xi núú Xítóhó Jesucrìstú te na cuíta nihnú-yu. Te vitna nchaa-o chǐ ná càchí-ó sǎ Xítóhó Jesucrìstú quixi tucu-gá.

²³ Te xìcáⁿ táhù-í núú Xítóhó Jesucrìstú sá ná chìndee chitúu ñaha-gǎ xii-ndo. ²⁴ Te ío cùu iní ñáhà-í xii-ndo nàcuáa ndècu-o ichi Xítóhó Jesucrìstú, te ducaⁿ na cùnduu, te ío chí cádá ndèe iní-ñǎ vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

872f7754-0986-5ecd-a059-925a708a6939